

傷寒雜病論條辨

傷寒論

辨太陽病脉證并治上第五

一、太陽之爲病，脉浮，頭項強痛而惡寒。

二、太陽病，發熱汗出，惡風，脉緩者，名爲中風。

三、太陽病，或已發熱，或未發熱，必惡寒，体痛，嘔逆，脉阴阳俱緊者，名爲傷寒。

四、傷寒一日，太陽受之，脉若靜者，爲不傳，頗欲吐，若躁煩脉數急者，爲傳也。

五、傷寒二、三日，阳明、少阳證不見者，爲不傳也。

六、太陽病，發熱而渴，不惡寒者爲溫病。若發汗已，身灼熱者，名風溫。風溫爲病，脉阴阳俱浮，自汗出，身重，多眠睡，鼻息必鼾，語言難出。若被下者，小便利，直視失溲。若被火者，微發黃色，劇則如惊癇，時瘈瘲。若火熏之，一逆尚引日，再逆促命期。

七、病有發熱惡寒者，發于陽也。无熱惡寒者，發于陰也。發于陽，七日愈。發于陰，六日愈。以陽數七陰數六故也。

八、太陽病，頭痛至七日以上自愈者，以行其經盡故也。若欲作再經者，針足陽明，使經不傳則愈。

九、太陽病，欲解時，从巳至未上。

一〇、風家，表解而不了了者，十二日愈。

一一、病人身大熱，反欲得衣者，熱在皮膚，寒在骨髓也；身大寒，反不欲近衣者，寒在皮膚，熱在骨髓也。

一二、太陽中風，陽浮而陰弱。陽浮者，熱自發；陰弱者，汗自出。𦵿𦵿惡寒，淅淅惡風，翕翕發熱，鼻鳴干嘔者，桂枝湯主之。

一三、太陽病，頭痛發熱，汗出惡風，桂枝湯主之。

一四、太陽病，項背強几几，反汗出惡風者，桂枝加葛根湯主之。

一五、太陽病，下之后，其氣上沖者，可与桂枝湯。方用前法。若不上沖者，

不得与之。

一六、太陽病三日，已發汗，若吐、若下、若溫針，仍不解者，此爲壞病。桂枝不中与之也。觀其脈證，知犯何逆，隨證治之。桂枝本爲解肌，若其人脈浮緊，發熱汗不出者，不可与之也。常須識此，勿令誤也。

一七、若酒客病，不可与桂枝湯，得之則嘔，以酒客不喜甘故也。

一八、喘家作，桂枝湯加厚朴、杏子佳。桂枝加厚朴杏子湯

一九、凡服桂枝湯吐者，其后必吐膿血也。

二〇、太陽病，發汗，遂漏不止，其人惡風，小便難，四肢微急，難以屈伸者，桂枝加附子湯主之。

二一、太陽病，下之后，脈促，胸滿者，桂枝去芍藥湯主之。

二二、若微寒者，桂枝去芍藥加附子湯主之。

二三、太陽病，得之八九日，如瘧狀，發熱惡寒，熱多寒少，其人不嘔，清便欲自可，一日二三度發。脈微緩者，爲欲愈也，脈微而惡寒者，此陰陽俱虛，

不可更發汗、更下、更吐也。面色反有熱色者，未欲解也。以其不能得小汗出，身必痒，宜桂枝麻黃各半湯。

二四、太陽病，初服桂枝湯，反煩不解者，先刺風池、風府，却與桂枝湯則愈。

二五、服桂枝湯，大汗出，脈洪大者，與桂枝湯，如前法，若形似瘧，一日再發者，汗出必解，宜桂枝二麻黃一湯。

二六、服桂枝湯，大汗出后，大煩渴不解，脈洪大者，白虎加人參湯主之。

二七、太陽病，發熱惡寒，熱多寒少，脈微弱者，此無陽也。不可發汗，宜桂枝二越婢一湯。

二八、服桂枝湯，或下之，仍頭項強痛，翕翕發熱，無汗，心下滿，微痛，小便不利者，桂枝去桂加茯苓白術湯主之。

二九、傷寒，脈浮，自汗出，小便數，心煩，微惡寒，腳攣急。反與桂枝，欲攻其表，此誤也。得之便厥，咽中干，煩躁吐逆者，作甘草干姜湯與之。以復其陽。若厥愈足溫者，更作芍藥甘草湯與之。其腳即伸。若胃氣不和，譫語者，

少与調胃承氣湯，若重發汗，復加燒針者，四逆湯主之。

三〇、問曰：證象陽旦，按法治之而增劇，厥逆，咽中干，兩脰拘急而譫語。師曰：言夜半手足當溫，兩脚當伸。后如師言。何以知此？答曰：寸口脈浮而大，浮爲風，大爲虛，風則生微熱，虛則兩脰攣，病形象桂枝，因加附子參其間，增桂令汗出，附子溫經，亡陽故也。厥逆，咽中干，煩躁，陽明內結，譫語煩亂，更飲甘草干姜湯。夜半陽氣還，兩足當熱，脰尙微拘急，重与芍藥甘草湯，爾乃脰伸。以承氣湯微瀉，則止其譫語，故知病可愈。

辨太陽病脈證并治中第六

三一、太陽病，項背強几几，无汗惡風，葛根湯主之。

三二、太陽与陽明合病者，必自下利。葛根湯主之。

三三、太陽与陽明合病，不下利，但嘔者，葛根加半夏湯主之。

三四、太陽病，桂枝證，医反下之，利遂不止。脈促者，表未解也。喘而汗出

者，葛根黃芩黃連湯主之。

三五、太陽病，頭痛發熱，身疼腰痛，骨節疼痛，惡風无汗而喘者，麻黃湯主之。

三六、太陽与陽明合病，喘而胸滿者，不可下，宜麻黃湯。

三七、太陽病，十日以去，脉浮細而嗜臥者，外已解也。設胸滿脅痛者，与小柴胡湯，脉但浮者，与麻黃湯。

三八、太陽中風，脉浮緊，發熱惡寒，身疼痛，不汗出而煩躁者，大青龍湯主之。若脉微弱，汗出惡風者，不可服之，服之則厥逆，筋惕肉瞤。此爲逆也。

三九、傷寒、脉浮緩，身不疼，但重，乍有輕時，无少阴證者，大青龍湯發之。

四〇、傷寒表不解，心下有水气，干嘔，發熱而咳，或渴，或利，或噎，或小便利，或不利，少腹滿，或喘者，小青龍湯主之。

四一、傷寒，心下有水气，咳而微喘，發熱不渴，服湯已，渴者，此寒去欲解也。小青龍湯主之。

四二、太陽病，外證未解，脈浮弱者，當以汗解，宜桂枝湯。

四三、太陽病，下之微喘者，表未解故也，桂枝加厚朴杏子湯主之。

四四、太陽病，外證未解，不可下也。下之爲逆。欲解外者，宜桂枝湯。

四五、太陽病，先發汗，不解，而復下之，脈浮者不愈，浮爲在外，而反下之，故令不愈。今脈浮，故知在外，當須解外則愈，宜桂枝湯。

四六、太陽病，脈浮緊，无汗，發熱，身疼痛，八九日不解，表證仍在。此當發其汗。服藥已，微除。其人發煩，目瞑，劇者必衄。衄乃解。所以然者，陽氣重故也。麻黃湯主之。

四七、太陽病，脈浮緊，發熱，身无汗，自衄者愈。

四八、二陽并病，太陽初得病時，發其汗，汗先出不徹，因轉屬陽明，續自微汗出，不惡寒。若太陽病證不罷者，不可下，下之爲逆。如此可小發汗。設面色緣緣正赤者，陽氣怫鬱，在表，當解之熏之。若發汗不徹，不足言。陽氣怫鬱，不得越，當汗不汗，其人躁煩，不知痛處，乍在腹中，乍在四肢，按之不

可得。其人短氣，但坐，以汗出不徹故也。更發汗則愈。何以知汗出不徹？以脉澀故知也。

四九、脉浮數者，法當汗出而愈，若下之，身重，心悸者，不可發汗，當自汗出乃解。所以然者，尺中脉微，此里虛，須表里實，津液自和，便自汗出愈。

五〇、脉浮緊者，法當身疼痛，宜以汗解之。假令尺中遲者，不可發汗。何以知然？以榮氣不足，血少故也。

五一、脉浮者，病在表，可發汗，宜麻黃湯。

五二、脉浮而數者，可發汗，宜麻黃湯。

五三、病常自汗出者，此爲榮氣和。榮氣和者，外不諧，以衛氣不共榮氣諧和故爾。以榮行脉中，衛行脉外，復發其汗，榮衛和則愈，宜桂枝湯。

五四、病人藏无他病，時發熱、自汗出而不愈者，此衛氣不和也，先其時發汗則愈，宜桂枝湯。

五五、傷寒，脉浮緊，不發汗，因致衄者，麻黃湯主之。

五六、傷寒，不大便六七日，頭痛有熱者，與承氣湯，其小便清者，知不在里，仍在表也，當須發汗。若頭痛者，必衄，宜桂枝湯。

五七、傷寒發汗，已解。半日許復煩，脈浮數者，可更發汗，宜桂枝湯。

五八、凡病，若發汗，若吐，若下，若亡血、亡津液，陰陽自和者，必自愈。

五九、大下之后，復發汗，小便不利者，亡津液故也。勿治之，得小便利，必自愈。

六〇、下之后，復發汗，必振寒，脈微細。所以然者，以內外俱虛故也。

六一、下之后，復發汗，晝日煩躁不得眠，夜而安靜，不嘔，不渴，無表證，脈沉微，身無大熱者，干姜附子湯主之。

六二、發汗后，身疼痛，脈沉遲者，桂枝加芍藥生姜各一兩人參三兩新加湯主之。

六三、發汗后，喘家不可更行桂枝湯。汗出而喘，無大熱者，可與麻黃杏仁甘草石膏湯。

六四、發汗過多，其人叉手自冒心，心下悸，欲得按者，桂枝甘草湯主之。

六五、發汗后，其人臍下悸者，欲作奔豚，茯苓桂枝甘草大棗湯主之。

六六、發汗后，腹脹滿者，厚朴生姜半夏甘草人參湯主之。

六七、傷寒，若吐、若下后，心下逆滿，氣上沖胸，起則頭眩，脈沉緊，發汗則動經，身爲振振搖者，茯苓桂枝白術甘草湯主之。

六八、發汗病不解，反惡寒者，虛故也。芍藥甘草附子湯主之。

六九、發汗，若下之，病仍不解，煩躁者，茯苓四逆湯主之。

七〇、發汗后，惡寒者，虛故也。不惡寒，但熱者，實也，當和胃氣，與調胃承氣湯。

七一、太陽病，發汗后，大汗出，胃中干，煩躁不得眠，欲得飲水者，少少與飲之，令胃氣和則愈。若脈浮，小便不利，微熱消渴者，五苓散主之。

七二、發汗已，脈浮數，煩渴者，五苓散主之。

七三、傷寒，汗出而渴者，五苓散主之。不渴者，茯苓甘草湯主之。

七四、中風發熱，六七日不解而煩，有表里證。渴欲飲水，水入則吐者，名曰水逆。五苓散主之。

七五、未持脉時，病人手叉自冒心，師因教試令咳而不咳者，此必兩耳聾无闻也，所以然者，以重發汗虛故如此。發汗后，飲水多，必喘。以水灌之，亦喘。

七六、發汗后，水藥不得入口，爲逆。若更發汗，必吐下不止。發汗吐下后，虛煩不得眠，若劇者，必反復顛倒，心中懊憹，梔子豉湯主之。若少氣者，梔子甘草豉湯主之。若嘔者，梔子生薑豉湯主之。

七七、發汗，若下之，而煩熱，胸中窒者，梔子豉湯主之。

七八、傷寒五六日，大下之后，身熱不去，心中結痛者，未欲解也，梔子豉湯主之。

七九、傷寒下后，心煩腹滿，臥起不安者，梔子厚朴湯主之。

八〇、傷寒，醫以丸藥大下之，身熱不去，微煩者，梔子干姜湯主之。

八一、凡用梔子湯（注：《脉經》中梔子豉湯條文，梔子豉湯均作梔子湯），病

人舊微溏者，不可與服之。

八二、太陽病發汗，汗出不解，其人仍發熱，心下悸，頭眩，身瞤動，振振欲擗地者，真武湯主之。

八三、咽喉干燥者，不可發汗。

八四、淋家，不可發汗，汗出必便血。

八五、瘡家，雖身疼痛，不可發汗，發汗則瘡。

八六、衄家，不可發汗，汗出，必額上陷，脈急緊，直視不能眴，不得眠。

八七、亡血家，不可發汗，發汗則寒慄而振。

八八、汗家重發汗，必恍惚心亂，小便已陰疼，與禹余糧丸。

八九、病人有寒，復發汗，胃中冷，必吐衄。

九〇、本發汗而復下之，此爲逆也，若先發汗，治不爲逆。本先下之而反汗之，爲逆。若先下之，治不爲逆。

九一、傷寒，醫下之，續得下利清谷不止，身疼痛者，急當救裏。後身疼痛，

清便自調者，急當救表。救里，宜四逆湯。救表，宜桂枝湯。

九二、病發熱頭痛，脉反沉，若不差，身体疼痛，當救其里，四逆湯方。

九三、太陽病，先下而不愈，因復發汗，以此表里俱虛，其人因致冒，冒家汗出自愈。所以然者，汗出表和故也，里未和，然後復下之。

九四、太陽病未解，脉阴阳俱停，必先振栗汗出而解。但阳脉微者，先汗出而解。但阴脉微者，下之而解。若欲下之，宜調胃承氣湯。

九五、太陽病，發熱汗出者，此爲榮弱衛強，故使汗出，欲救邪風者，宜桂枝湯。

九六、傷寒五六日，中風。往來寒熱，胸脅苦滿，嘿嘿不欲飲食，心煩喜嘔，或胸中煩而不嘔，或渴，或腹中痛，或脅下痞硬，或心下悸、小便不利，或不渴、身有微熱，或咳者，小柴胡湯主之。

九七、血弱氣盡，腠理開，邪氣因入，與正氣相搏，結于脅下。正邪分爭，往來寒熱，休作有時，嘿嘿不欲飲食，藏府相連，其痛必下，邪高痛下，故使嘔

也，小柴胡湯主之。服柴胡湯已，渴者屬陽明，以法治之。

九八、得病六七日，脈遲浮弱，惡風寒，手足溫，醫二三下之，不能食，而脅下滿痛，面目及身黃，頸項強，小便難者，與柴胡湯，后必下重。本渴飲水而嘔者，柴胡不中與也，食谷者噦。

九九、傷寒四五日，身熱惡風，頸項強，脅下滿，手足溫而渴者，小柴胡湯主之。

一〇〇、傷寒，陽脈澀，陰脈弦，法當腹中急痛。先與小建中湯，不差者，小柴胡湯主之。

一〇一、傷寒中風，有柴胡證，但見一證便是，不必悉具。凡柴胡湯病證而下之，若柴胡證不罷者，復與柴胡湯，必蒸蒸而振，却復發熱汗出而解。

一〇二、傷寒二三日，心中悸而煩者，小建中湯主之。

一〇三、太陽病，過經十余日，反二三下之，后四五日，柴胡證仍在者，先与小柴胡湯。嘔不止，心下急，郁郁微煩者，爲未解也，与大柴胡湯下之則愈。

一〇四、傷寒十三日，不解，胸脅滿而嘔，日晡所發潮熱，已而微利，此本柴胡證，下之以不得利，今反利者，知醫以九藥下之，此非其治也。潮熱者，實也。先宜服小柴胡湯以解外，后以柴胡加芒硝湯主之。

一〇五、傷寒十三日，過經譫語者，以有熱也，當以湯下之。若小便利者，大便當硬，而反下利，脉調和者，知醫以九藥下之，非其治也。若自下利者，脉當微厥。今反和者，此爲內實也。調胃承氣湯主之。

一〇六、太陽病不解，熱結膀胱，其人如狂，血自下。下者愈。其外不解者，尙未可攻，當先解其外。外解已，但少腹急結者，乃可攻之，宜桃核承氣湯。

一〇七、傷寒八九日，下之，胸滿煩驚，小便不利，譫語，一身尽重，不可轉側者，柴胡加龍骨牡蠣湯主之。

一〇八、傷寒腹滿譫語，寸口脉浮而緊，此肝乘脾也，名曰縱，刺其門。

一〇九、傷寒發熱，噤噤惡寒，大渴欲飲水，其腹必滿，自汗出，小便利，其病欲解，此肝乘肺也，名曰橫，刺期門。

一一〇、太陽病二日，反躁，反熨其背而大汗出，大熱入胃，（一作二日內燒瓦熨背。大汗出。火氣入胃。胃中水竭，躁煩，必發譫語。十余日，振栗，自下利者，此爲欲解也。故其發汗，从腰以下不得汗，欲小便不得，反嘔欲失溲，足下惡風，大便硬，小便當數，而反不數，及不多。大便已，頭卓然而痛，其人足心必熱。谷氣下流故也。

一一一、太陽病中風，以火劫發汗，邪風被火熱，血氣流溢，失其常度。兩陽相熏灼。其身發黃，陽盛則欲衄，陰虛小便難，陰陽俱虛竭，身體則枯燥。但頭汗出，劑頸而還，腹滿微喘，口干咽爛，或不大便。久則譫語，甚者至噦，手足躁扰，捻衣摸床。小便利者，其人可治。

一二二、傷寒脉浮，医者以火迫劫之。亡陽。必惊狂，臥起不安者，桂枝去芍藥加蜀漆牡蠣龍骨救逆湯主之。

一二三、形作傷寒，其脉不弦緊而弱，弱者必渴，被火必譫語，弱者發熱脉浮，解之，當汗出愈。

一一四、太陽病，以火熏之，不得汗，其人必躁。到經不解，必清血，名爲火邪。

一一五、脈浮熱甚，而反灸之，此爲實。實以虛治。因火而動，必咽燥吐血。

一一六、微數之脈，慎不可灸。因火爲邪，則爲煩逆，追虛逐實，血散脈中，火氣雖微，內攻有力，焦骨傷筋，血難復也。脈浮，宜以汗解，用火灸之，邪无从出，因火而盛，病从腰以下，必重而痺，名火逆也。欲自解者，必當先煩，煩乃有汗而解。何以知之？脈浮，故知汗出解。

一一七、燒針令其汗，針處被寒，核起而赤者，必發奔豚，氣从少腹上冲心者，灸其核上各一壯，与桂枝加桂湯。更加桂二兩也。

一一八、火逆下之，因燒針煩躁者，桂枝甘草龍骨牡蠣湯主之。

一一九、太陽傷寒者，加溫針，必惊也。

一二〇、太陽病，當惡寒發熱，今自汗出，反不惡寒發熱，关上脈細數者，以医吐之過也。一二日吐之者，腹中饑，口不能食，三四日吐之者，不喜糜粥，

欲食冷食，朝食暮吐，以医吐之所致也。此爲小逆。

一二一、太阳病吐之，但太阳病當惡寒，今反不惡寒，不欲近衣，此爲吐之內煩也。

一二二、病人脉數，數爲熱，當消谷引食，而反吐者，此以發汗，令阳气微，膈气虛，脉乃數也。數爲客熱。不能消谷，以胃中虛冷，故吐也。

一二三、太阳病，過經十余日，心下溫溫欲吐，而胸中痛，大便反澹，腹微滿，郁郁微煩，先此時自極吐下者，与調胃承气湯。若不爾者，不可与。但欲嘔，胸中痛，微澹者，此非柴胡湯證，以嘔，故知極吐下也。

一二四、太阳病六七日，表證仍在，脉微而沉，反不結胸，其人發狂者，以熱在下焦，少腹當硬滿。小便自利者，下血乃愈。所以然者，以太阳隨經，瘀熱在里故也。抵當湯主之。

一二五、太阳病，身黃，脉沉結，少腹硬。小便不利者，爲无血也。小便自利，其人如狂者，血證諦也。抵當湯主之。

一二六、傷寒有熱，少腹滿，應小便不利，今反利者，爲有血也。當下之，不可余藥。宜抵當丸。

一二七、太陽病，小便利者，以飲水多，必心下悸。小便少者，必苦里急也。

辨太陽病脉證并治（下）第七

一二八、問曰：病有結胸，有藏結，其狀何如？答曰：按之痛，寸脉浮，关脉沉，名曰結胸也。

一二九、何謂藏結？答曰：如結胸狀，飲食如故，時時下利，寸脉浮，关脉小細沉緊，名曰藏結，舌上白胎滑者，難治。

一三〇、藏結无阳證，不往來寒熱，其人反靜，舌上胎滑者，不可攻也。

一三一、病發于阳而反下之，熱入因作結胸。病發于阴而反下之，因作痞也。所以成結胸者，以下之太早故也。結胸者，項亦強，如柔痙狀，下之則和，宜大陷胸丸。

一三二、結胸證，其脉浮大者，不可下，下之則死。

一三三、結胸證悉具，煩躁者亦死。

一三四、太陽病，脉浮而動數，浮則爲風，數則爲熱，動則爲痛，數則爲虛。頭痛發熱，微盜汗出，而反惡寒者，表未解也。醫反下之，動數變遲，膈內拒痛，胃中空虛，客气動膈。短气躁煩，心中懊憹，阳气內陷，心下因硬，則爲結胸，大陷胸湯主之。若不結胸，但頭汗出，余處无汗，劑頸而还，小便不利，身必發黃。

一三五、傷寒六七日，結胸熱實，脉沉而緊，心下痛，按之石硬者，大陷胸湯主之。

一三六、傷寒十余日，熱結在里，復往來寒熱者，与大柴胡湯。但結胸，无大熱。无大熱者，此爲水結在胸脅也。但頭微汗出者，大陷胸湯主之。

一三七、太陽病，重發汗而復下之，不大便五六日，舌上燥而渴，日晡所，小有潮熱（一云日晡所發，心胸大煩）。从心下至少腹鞭滿而痛，不可近者，大陷

胸湯主之。

一三八、小結胸病，正在心下，按之則痛，脉浮滑者，小陷胸湯主之。

一三九、太陽病二三日，不能臥，但欲起，心下必結，脉微弱者，此本有寒分也。反下之，若利止。必作結胸。未止者，四日復下之，此作協熱利也。

一四〇、太陽病下之，其脉促，不結胸者，此爲欲解也。脉浮者，必結胸，脉緊者，必咽痛。脉弦者，必兩脅拘急。脉細數者，頭痛未止。脉沉緊者，必欲嘔，脉沉滑者，協熱利。脉浮滑者，必下血。

一四一、病在陽，應以汗解之，反以冷水瀉之，若灌之，其熱被劫，不得去，弥更益煩，肉上粟起，意欲飲水，反不渴者，服文蛤散。若不差者，与五苓散。寒實結胸，无熱證者，与三物小陷胸湯。白散亦可服。三物小白散。

一四二、太陽与少阳并病，頭項强痛，或眩冒，時如結胸，心下痞硬者，當刺大椎第一間、肺俞、肝俞，慎不可發汗。發汗則譫語，脉弦，五日譫語不止，當刺期門。

一四三、婦人中風，發熱惡寒，經水適來，得之七八日，熱除而脈遲身涼，胸脅下滿如結胸狀，譫語者。此爲熱入血室也。當刺期門，隨其實而取之。

一四四、婦人中風七八日，續得寒熱，發作有時，經水適斷者，此爲熱入血室。其血必結，故使如瘧狀，發作有時，小柴胡湯主之。

一四五、婦人傷寒，發熱，經水適來，晝日明了，暮則譫語如見鬼狀者，此爲熱入血室。无犯胃氣及上二焦，必自愈。

一四六、傷寒六七日，發熱，微惡寒，支節煩疼，微嘔，心下支結，外證未去者，柴胡桂枝湯主之。

一四七、傷寒五六日，已發汗而復下之，胸脅滿微結，小便不利，渴而不嘔，但頭汗出，往來寒熱，心煩者，此爲未解也。柴胡桂枝干姜湯主之。

一四八、傷寒五六日，頭汗出，微惡寒，手足冷，心下滿，口不欲食，大便硬，脈細者，此爲陽微結，必有表，復有里也。脈沉，亦在里也。汗出，爲陽微。假令純陰結，不得復有外證，悉入在里，此爲半在里半在外也。脈雖沉緊，不

得爲少陰病。所以然者，陰不得有汗，今頭汗出，故知非少陰也。可與小柴胡湯。設不了了者，得屎而解。

一四九、傷寒五六日，嘔而發熱者，柴胡湯證具。而以他藥下之，柴胡證仍在者，復與柴胡湯。此雖已下之，不爲逆。必蒸蒸而振，却發熱汗出而解。若心下滿而硬痛者，此爲結胸也。大陷胸湯主之。但滿而不痛者，此爲痞。柴胡不中与之，宜半夏瀉心湯。

一五〇、太陽少陽并病，而反下之，成結胸，心下硬，下利不止，水漿不下，其人煩。

一五一、脈浮而緊，而復下之，緊反入里則作痞。按之自濡，但氣痞耳。

一五二、太陽中風，下利嘔逆，表解者，乃可攻之。其人漐漐汗出，發作有時，頭痛，心下痞硬滿，引脅下痛，干嘔短氣，汗出不惡寒者，此表解里未和也。十棗湯主之。

一五三、太陽病，醫發汗，遂發熱惡寒，因復下之，心下痞，表里俱虛。陰陽

氣并竭，无陽則陰獨。復加燒針，因胸煩。面色青黃。肢潤潤者，難治。今色微黃，手足溫者易愈。

一五四、心下痞，按之濡，其脈关上浮者，大黃黃連瀉心湯主之。

一五五、心下痞，而復惡寒汗出者，附子瀉心湯主之。

一五六、本以下之故，心下痞，與瀉心湯。痞不解，其人渴而口燥，煩，小便不利者，五苓散主之。

一五七、傷寒汗出，解之後，胃中不和，心下痞硬，干噯食臭，脅下有水氣，腹中雷鳴，下利者，生姜瀉心湯主之。

一五八、傷寒中風，醫反下之，其人下利日數十行，谷不化，腹中雷鳴，心下痞硬而滿，干嘔，心煩不得安。醫見心下痞，謂病不尽，復下之，其痞益甚，此非結熱，但以胃中虛，客氣上逆，故使硬也。甘草瀉心湯主之。

一五九、傷寒，服湯藥，下利不止，心下痞硬。服瀉心湯已，復以他藥下之，利不止。醫以理中与之，利益甚。理中者，理中焦，此利在下焦。赤石脂禹余

糧湯主之。復不止者，當利其小便。

一六〇、傷寒吐下后，發汗，虛煩，脉甚微，八九日心下痞硬，脅下痛，气上冲咽喉，眩冒，經脉動惕者，久而成痿。

一六一、傷寒發汗，若吐，若下，解后，心下痞硬，噫气不除者，旋覆代赭湯主之。

一六二、下后，不可更行桂枝湯。若汗出而喘，无大熱者，可与麻黃杏仁甘草石膏湯。

一六三、太陽病，外證未除，而數下之，遂協熱而利，利下不止，心下痞硬，表里不解者，桂枝人參湯主之。

一六四、傷寒大下后，復發汗，心下痞，惡寒者，表未解也。不可攻痞，當先解表，表解乃可攻痞。解表，宜桂枝湯，攻痞，宜大黃黃連瀉心湯。

一六五、傷寒發熱，汗出不解，心中痞硬，嘔吐而下利者，大柴胡湯主之。

一六六、病如桂枝證，頭不痛，項不强，寸脉微浮，胸中痞硬，气上冲咽喉不

得息者，此爲胸有寒也。當吐之。宜瓜蒂散。

一六七、病脅下素有痞，連在臍旁，痛引少腹，入陰筋者，此名藏結，死。

一六八、傷寒，若吐、若下後，七八日不解，熱結在里。表裏俱熱，時時惡風，大渴，舌上干燥而煩，欲飲水數升者，白虎加人參湯主之。

一六九、傷寒，無大熱，口燥渴，心煩，背微惡寒者，白虎加人參湯主之。

一七〇、傷寒，脈浮，發熱無汗，其表不解，不可與白虎湯。渴欲飲水，無表證者，白虎加人參湯主之。

一七一、太陽少陽并病，心下硬，頸項強而眩者，當刺大椎、肺俞、肝俞。慎勿下之。

一七二、太陽與少陽合病，自下利者，與黃芩湯。若嘔者，黃芩加半夏生薑湯主之。

一七三、傷寒，胸中有熱，胃中有邪氣，腹中痛，欲嘔吐者，黃連湯主之。

一七四、傷寒八九日，風濕相搏，身體疼煩，不能自轉側，不嘔不渴，脈浮虛

而澀者，桂枝附子湯主之，若其人大便硬，臍下心下硬，小便自利者（康平本做：不利），去桂加白術湯主之。

一七五、風濕相搏，骨節疼煩，掣痛不得屈伸，近之則痛劇，汗出短氣，小便不利，惡風不欲去衣，或身微腫者，甘草附子湯主之。

一七六、傷寒，脈浮滑，此表有熱，里有寒。白虎湯主之。

一七七、傷寒，脈結代，心動悸，炙甘草湯主之。

一七八、脈按之來緩，時一止復來者，名曰結。又脈來動而中止，更來小數，中有還者反動，名曰結，陰也。脈來動而中止，不能自還，因而復動者，名曰代，陰也。得此脈者，必難治。

辨陽明病脈證并治第八

一七九、問曰：病有太陽陽明，有正陽陽明，有少陽陽明，何謂也？答曰：太陽陽明者，脾約是也，正陽陽明者，胃家實是也。少陽陽明者，發汗利小便已，

胃中燥煩實，大便難是也。

一八〇、陽明之爲病，胃家實（一作寒）是也。

一八一、問曰：何緣得陽明病？答曰：太陽病，若發汗，若下，若利小便，此亡津液，胃中干燥，因轉屬陽明，不更衣，內實，大便難者，此名陽明也。

一八二、問曰：陽明病外證云何？答曰：身熱，汗自出，不惡寒反惡熱也。

一八三、問曰：病有得之一日，不發熱而惡寒者，何也？答曰：雖得之一日，惡寒將自罷，即自汗出而惡熱也。

一八四、問曰：惡寒何故自罷？答曰：陽明居中主土也，萬物所歸，无所復傳，始雖惡寒，二日自止，此爲陽明病也。

一八五、本太陽，初得病時，發其汗，汗先出不徹，因轉屬陽明也。傷寒發熱无汗，嘔不能食，而反汗出濇濇然者，是轉屬陽明也。

一八六、傷寒三日，陽明脉大。

一八七、傷寒脉浮而緩，手足自溫者，是爲系在太陰。太陰者，身當發黃，若

小便自利者，不能發黃。至七八日，大便硬者，爲陽明病也。

一八八、傷寒轉系陽明者，其人澀然微汗出也。

一八九、陽明中風，口苦咽干，腹滿微喘，發熱惡寒，脈浮而緊。若下之，則腹滿，小便難也。

一九〇、陽明病，若能食，名中風，不能食，名中寒。

一九一、陽明病，若中寒者，不能食，小便不利，手足澀然汗出，此欲作固瘕。必大便初硬后溏。所以然者，以胃中冷，水谷不別故也。

一九二、陽明病，初欲食，小便反不利，大便自調，其人骨節疼，翕翕如有熱狀，奄然發狂，澀然汗出而解。汗出而解者，此水不勝谷氣，與汗共并，脈緊則愈。

一九三、陽明病，欲解時，從申至戌上。

一九四、陽明病，不能食，攻其熱必噦。所以然者，胃中虛冷故也。以其人本虛，攻其熱必噦。

一九五、陽明病，脈遲，食難用飽，飽則微煩頭眩，必小便難，此欲作谷瘕。雖下之，腹滿如故。所以然者，脈遲故也。

一九六、陽明病，法多汗，反无汗，其身如虫行皮中狀者，此以久虛故也。

一九七、冬陽明病，反无汗，而小便利，二三日嘔而咳，手足厥者，必苦頭痛，若不咳，不嘔，手足不厥者，頭不痛。

一九八、冬陽明病，但頭眩，不惡寒，故能食而咳，其人咽必痛，若不咳者，咽不痛。

一九九、陽明病无汗，小便不利，心中懊懣者，身必發黃。

二〇〇、陽明病，被火，額上微汗出而小便不利者，必發黃。

二〇一、陽明病，脈浮而緊者，必潮熱，發作有時，但浮者，必盜汗出。

二〇二、陽明病，口燥，但欲漱水不欲咽者，此必衄。

二〇三、陽明病，本自汗出，醫更重發汗，病已差，尚微煩不了了者，此必大便硬故也。以亡津液，胃中干燥，故令大便硬。當問其小便日几行，若本小便

日三四行，今日再行，故知大便不久出，今爲小便數少，以津液當還入胃中，故知不久必大便也。

二〇四、傷寒嘔多，雖有陽明證，不可攻之。

二〇五、陽明病，心下硬滿者，不可攻之，攻之利遂不止者死，利止者愈。

二〇六、陽明病，面合色赤，不可攻之。必發熱，色黃者，小便不利也。

二〇七、陽明病，不吐不下，心煩者，可與調胃承氣湯。

二〇八、陽明病，脈遲，雖汗出，不惡寒者，其身必重，短氣，腹滿而喘，有

潮熱。有潮熱者，此外欲解，可攻里也。手足濇然汗出者，此大便已硬也。大承氣湯主之。若汗多，微發熱惡寒者，外未解也，其熱不潮，未可與承氣湯，若腹大滿不通者，可與小承氣湯微和胃氣，勿令至大泄下。

二〇九、陽明病，潮熱，大便微硬者，可與大承氣湯。不硬者，不可與之。若不大便六七日，恐有燥屎，欲知之法，少與小承氣湯，湯入腹中，轉矢氣者，此有燥屎也，乃可攻之。若不轉矢氣者，此但初頭硬，后必溏，不可攻之，攻

之必脹滿不能食也。欲飲水者，与水則噦。其后發熱者，必大便復硬而少也，以小承氣湯和之。不轉矢氣者，慎不可攻也。

二一〇、夫實則譫語，虛則鄭聲。鄭聲者，重語也。直視譫語，喘滿者死，下利者亦死。

二一一、發汗多，重發汗者，亡其陽，譫語，脈短者死，脈自和者不死。

二一二、傷寒，若吐若下后，不解，不大便五六日，上至十余日，日晡所發潮熱，不惡寒，獨語如見鬼狀。若劇者，發則不識人，循衣摸床，惕而不安，微喘直視，脈弦者生，澀者死，微者，但發熱。譫語者，大承氣湯主之。若一服利，則止后服。

二一三、陽明病，其人多汗，以津液外出，胃中燥，大便必硬，硬則譫語，小承氣湯主之。若一服譫語止者，更莫復服。

二一四、陽明病，譫語，發潮熱，脈滑而疾者，小承氣湯主之。因與承氣湯一升，腹中轉氣者，更服一升。若不轉氣者，勿更與之。明日又不大便，脈反微

澀者，里虛也，爲難治，不可更與承氣湯也。

二二五、陽明病，譫語，有潮熱，反不能食者，胃中必有燥屎五六枚也，若能食者，但硬耳，宜大承氣湯下之。

二二六、陽明病，下血譫語者，此爲熱入血室，但頭汗出者，刺期門，隨其實而瀉之，澀然汗出則愈。

二二七、汗出譫語者，以有燥屎在胃中（此爲風）也。須下者，過經乃可下之。下之若早，語言必亂，以表虛里實故也。下之愈。宜大承氣湯。

二二八、傷寒四五日，脈沉而喘滿，沉爲在里。而反發其汗，津液越出，大便爲難。表虛里實，久則譫語。

二二九、三陽合病，腹滿身重，難於轉側，口不仁面垢，譫語遺尿。發汗則譫語，下之則額上生汗，手足逆冷。若自汗出者，白虎湯主之。

二二〇、二陽并病，太陽證罷，但發潮熱，手足絳絳汗出，大便難而譫語者，下之則愈，宜大承氣湯。

二二一、陽明病，脈浮而緊，咽燥口苦，腹滿而喘，發熱汗出，不惡寒，反惡熱，身重。若發汗則躁，心煩憤反譫語，若加溫針，必怵惕，煩躁不得眠，若下之，則胃中空虛，客氣動膈，心中懊憹。舌上胎者。梔子豉湯主之。

二二二、若渴欲飲水，口干舌燥者，白虎加人參湯主之。

二三三、若（脈浮發熱）渴欲飲水，小便不利者，猪苓湯主之。

二二四、陽明病，汗出多而渴者，不可與猪苓湯。以汗多胃中燥，猪苓湯復利其小便故也。

二二五、脈浮而遲，表熱里寒，下利清谷者，四逆湯主之。

二二六、若胃中虛冷，不能食者，飲水則噦。

二二七、脈浮發熱，口干鼻燥，能食者則衄。

二二八、陽明病下之，其外有熱，手足溫，不結胸（康平本做：小結胸），心中懊憹，饑不能食，但頭汗出者，梔子豉湯主之。

二二九、陽明病，發潮熱，大便溏，小便自可，胸脅滿不去者，與小柴胡湯。（康

平本作：柴胡湯主之。

二三〇、陽明病，脅下硬滿，不大便而嘔，舌上白胎者，可與小柴胡湯。上焦得通，津液得下，胃氣因和，身濺然汗出而解。

二三一、陽明中風，脈弦浮大，而短氣，腹都滿，脅下及心痛，久按之氣不通，鼻干，不得汗，嗜臥，一身及目悉黃，小便難，有潮熱，時時噦，耳前後腫。刺之小差，外不解。病過十日，脈續浮者，與小柴胡湯。

二三二、脈但浮，無余證者，與麻黃湯。若不尿，腹滿加噦者，不治。

二三三、陽明病，自汗出，若發汗，小便自利者，此爲津液內竭。雖硬不可攻之，當須自欲大便，宜蜜煎導而通之。若土瓜根及大豬胆汁，皆可爲導。

二三四、陽明病，脈遲，汗出多，微惡寒者，表未解也，可發汗，宜桂枝湯。

二三五、陽明病，脈浮，無汗而喘者，發汗則愈，宜麻黃湯。

二三六、陽明病，發熱汗出者，此爲熱越。不能發黃也。但頭汗出，身無汗，劑頸而還，小便不利，渴引水漿者，此爲瘀熱在里。身必發黃，茵陳蒿湯主之。

二三七、陽明證，其人喜忘者，必有蓄血。所以然者，本有久瘀血，故令喜忘。尿雖硬（康平本做：尿雖難），大便反易，其色必黑者，宜抵當湯下之。

二三八、陽明病，下之，心中懊憹而煩，胃中有燥屎者，可攻。腹微滿，初頭硬，后必溏，不可攻之。若有燥屎者，宜大承氣湯。

二三九、病人不大便五六日，繞臍痛，煩躁，發作有時者，此有燥屎，故使不大便也。

二四〇、病人煩熱，汗出則解，又如瘧狀，日晡所發熱者，屬陽明也。脈實者，宜下之。脈浮虛者，宜發汗。下之，與大承氣湯，發汗，宜桂枝湯。

二四一、大下后，六七日不大便，煩不解，腹滿痛者，此有燥屎也。所以然者，本有宿食故也。宜大承氣湯。

二四二、病人小便不利，大便乍難乍易，時有微熱，喘冒（一作怫郁）不能臥者，有燥屎也。宜大承氣湯。

二四三、食谷欲嘔，屬陽明也，吳茱萸湯主之。得湯反劇者，屬上焦也。

二四四、太陽病，（寸）緩（关）浮（尺）弱，其人發熱汗出，復惡寒，不嘔，但心下痞者，此以醫下之也。如其不下者，病人不惡寒而渴，渴者，此轉屬陽明也。小便數者，大便秘硬，不更衣十日，无所苦也。渴欲飲水，少少与之，但以法救之。渴者，宜五苓散。

二四五、脈陽微而汗出少者，爲自和也，汗出多者，爲太過。陽脈實因發其汗，出多者，亦爲太過。太過者，爲陽絕于里，亡津液，大便因硬也。

二四六、脈浮而芤，浮爲陽，芤爲陰。浮芤相搏，胃氣生熱，其陽則絕。

二四七、趺陽脈浮而澀，浮則胃氣強，澀則小便數。浮澀相搏，大便則硬，其脾爲約。麻子仁丸主之。

二四八、太陽病三日，發汗不解，蒸蒸發熱者，屬胃也。調胃承氣湯主之。

二四九、傷寒吐后，腹脹滿者，與調胃承氣湯。

二五〇、太陽病，若吐，若下，若發汗后，微煩，小便數，大便因硬者，與小承氣湯和之愈。

二五一、得病二三日，脉弱，无太阳柴胡證，煩躁，心下硬，至四五日，雖能食，以小承氣湯少少与微和之，令小安，至六日，与承氣湯一升。若不大便六七日，小便少者，雖不受食，但初頭硬，后必溏，未定成硬，攻之必溏。須小便利，屎定硬，乃可攻之。宜大承氣湯。

二五二、傷寒六七日，目中不了了，睛不和，无表里證，大便難，身微熱者，此爲實也。急下之，宜大承氣湯。

二五三、阳明病，發熱汗多者，急下之，宜大承氣湯。

二五四、發汗不解，腹滿痛者，急下之，宜大承氣湯。

二五五、腹滿不減，臧不足言，當下之，宜大承氣湯。

二五六、阳明少阳合病，必下利。其脉不負者，爲順也。負者，失也，互相克賊，名爲負也。脉滑而數者，有宿食也，當下之，宜大承氣湯。

二五七、病人无表里證，發熱七八日，雖脉浮數者，可下之。假令已下，脉數不解，合熱則消谷喜饑，至六七日不大便者，有瘀血，宜抵當湯。

二五八、若脉數不解，而下不止，必協熱便膿血也。

二五九、傷寒發汗已，身目爲黃。所以然者，以寒濕在里不解故也。以爲不可下也。于寒濕中求之。

二六〇、傷寒七八日，身黃如橘子色，小便不利，腹微滿者，茵陳蒿湯主之。

二六一、傷寒身黃，發熱，梔子檳皮湯主之。

二六二、傷寒瘀熱在里，身必黃，麻黃連軹赤小豆湯主之。

辨少阳病脉證并治第九

二六三、少阳之爲病，口苦，咽干，目眩也。

二六四、少阳中風，兩耳无所聞，目赤，胸中滿而煩者，不可吐下，吐下則悸而惊。

二六五、傷寒，脉弦細，頭痛發熱者，属少阳。少阳不可發汗，發汗則譫語。此属胃，胃和則愈。胃不和，煩而悸。

二六六、本太陽病不解，轉入少陽者，脅下硬滿，干嘔不能食，往來寒熱。尙未吐下，脉沉緊者，与小柴胡湯。

二六七、若已吐、下、發汗、溫針，譫語，柴胡湯證罷，此爲坏病。知犯何逆，以法治之。

二六八、三陽合病，脉浮大，上关上。但欲眠睡，目合則汗。

二六九、傷寒六七日，无大熱，其人躁煩者，此爲陽去入陰故也。

二七〇、傷寒三日，三陽爲盡，三陰當受邪，其人反能食而不嘔，此爲三陰不受邪也。

二七一、傷寒五日，少阳脉小者，欲已也。

二七二、少阳病，欲解時，从寅至辰上。

辨太阴病脉證并治第十

二七三、太阴之爲病，腹滿而吐，食不下，自利益甚，時腹自痛。若下之，必

胸下結硬。

二七四、太陰中風，四肢煩疼，脉阳微阴澀而長者，爲欲愈。

二七五、太陰病，欲解時，从亥至丑上。

二七六、太陰病，脉浮者，可發汗，宜桂枝湯。

二七七、自利不渴者，属太陰，以其藏有寒故也。當溫之。宜服四逆輩。

二七八、傷寒脉浮而緩，手足自溫者，系在太陰。太陰當發身黃，若小便利者，不能發黃。至七八日，雖暴煩下利日十余行，必自止。以脾家實，腐穢當去故也。

二七九、本太陽病，医反下之，因爾腹滿時痛者，属太陰也。桂枝加芍藥湯主之，大實痛者，桂枝加大黃湯主之。

二八〇、太陰爲病，脉弱，其人續自便利，設當行大黃、芍藥者，宜減之。以其人胃氣弱，易動故也。

辨少陰病脉證并治第十一

二八一、少陰之爲病，脉微細，但欲寐也。

二八二、少陰病，欲吐不吐，心煩，但欲寐，五六日自利而渴者，屬少陰也。虛故引水自救。若小便色白者，少陰病形悉具。小便白者，以下焦虛有寒，不能制水，故令色白也。

二八三、病人脉陰陽俱緊，反汗出者，亡陽也，此屬少陰，法當咽痛而復吐利。

二八四、少陰病，咳而下利，譫語者，被火氣劫故也。小便必難，以強責少陰汗也。

二八五、少陰病，脉細沉數，病爲在里，不可發汗。

二八六、少陰病，脉微，不可發汗，亡陽故也。陽已虛，尺脉弱澀者，復不可下之。

二八七、少陰病，脉緊，至七八日，自下利，脉暴微，手足反溫，脉緊反去者，爲欲解也，雖煩，下利必自愈。

二八八、少陰病，下利，若利自止，惡寒而蜷臥，手足溫者，可治。

二八九、少陰病，惡寒而蜷，時自煩，欲去衣被者，可治。

二九〇、少陰中風，脈陽微陰浮者，爲欲愈。

二九一、少陰病，欲解時，从子至寅上。

二九二、少陰病，吐利，手足不逆冷，反發熱者，不死。脈不至者，灸少陰七壯。

二九三、少陰病八九日，一身手足尽熱者，以熱在膀胱，必便血也。

二九四、少陰病，但厥无汗，而強發之，必動其血。未知从何道出，或从口鼻，或从目出者，是名下厥上竭，爲難治。

二九五、少陰病，惡寒身蜷而利，手足逆冷者，不治。

二九六、少陰病，吐利、躁煩、四逆者，死。

二九七、少陰病，下利止而頭眩，時時自冒者，死。

二九八、少陰病，四逆，惡寒而身蜷，脈不至，不煩而躁者，死。

二九九、少陰病，六七日，息高者，死。

三〇〇、少陰病，脈微細沉，但欲臥，汗出不煩，自欲吐。至五六日，自利，復煩躁不得臥寐者，死。

三〇一、少陰病，始得之，反發熱脈沉者，麻黃附子細辛湯主之。

三〇二、少陰病，得之二三日，麻黃附子甘草湯微發汗。以二三日無證，故微發汗也。（康平本作「无里證」）

三〇三、少陰病，得之二三日以上，心中煩，不得臥，黃連阿膠湯主之。

三〇四、少陰病，得之一二日，口中和，其背惡寒者，當灸之，附子湯主之。

三〇五、少陰病，身體痛，手足寒，骨節痛，脈沉者，附子湯主之。

三〇六、少陰病，下利，便膿血者，桃花湯主之。

三〇七、少陰病，二三日至四五日，腹痛，小便不利，下利不止，便膿血者，桃花湯主之。

三〇八、少陰病，下利，便膿血者，可刺。

三〇九、少阴病，吐利，手足逆冷，煩躁欲死者，吴茱萸湯主之。

三一〇、少阴病，下利，咽痛，胸滿，心煩，猪肤湯主之。

三一一、少阴病二三日，咽痛者，可与甘草湯。不差者，与桔梗湯。

三一二、少阴病，咽中傷，生瘡，不能語言，声不出者，苦酒湯主之。

三二三、少阴病，咽中痛，半夏散及湯主之。

三二四、少阴病，下利，白通湯主之。

三二五、少阴病，下利，脉微者，与白通湯。利不止，厥逆无脉，干嘔煩者，

白通加猪胆汁湯主之。服湯，脉暴出者死，微續者生。

三二六、少阴病，二三日不已，至四五日，腹痛，小便不利，四肢沉重疼痛，

自下利者，此爲有水气。其人或咳，或小便利，或下利，或嘔者，真武湯主之。

三二七、少阴病，下利清谷，里寒外熱，手足厥逆，脉微欲絕，身反不惡寒，

其人面色赤。或腹痛，或干嘔，或咽痛，或利止脉不出者。通脉四逆湯主之。

三二八、少阴病，四逆，其人或咳，或悸，或小便不利，或腹中痛，或泄利下

重者，四逆散主之。

三一九、少阴病，下利六七日，咳而嘔渴，心煩不得眠者，猪苓湯主之。

三二〇、少阴病，得之二三日，口燥咽干者，急下之，宜大承氣湯。

三二一、少阴病，自利清水，色純青，心下必痛，口干燥者，急下之，宜大承氣湯。

三二二、少阴病，六七日，腹脹不大便者，急下之，宜大承氣湯。

三二三、少阴病，脉沉者，急溫之，宜四逆湯。

三二四、少阴病，飲食入口則吐，心中溫溫欲吐，復不能吐，始得之，手足寒，脉弦遲者，此胸中實。不可下也。當吐之。若膈上有寒飲，干嘔者，不可吐也。

當溫之，宜四逆湯。

三二五、少阴病，下利，脉微澀，嘔而汗出，必數更衣，反少者，當溫其上，灸之。

辨厥陰病脉證并治第十二

三二六、厥陰之爲病，消渴，氣上撞心，心中疼熱，饑而不欲食，食則吐。吐
衄。下之，利不止。

三二七、厥陰中風，脉微浮爲欲愈，不浮爲未愈。

三二八、厥陰病，欲解時，从丑至卯上。

三二九、厥陰病，渴欲飲水者，少少与之愈。

三三〇、諸四逆厥者，不可下之，虛家亦然。

三三一、傷寒先厥，后發熱而利者，必自止，見厥復利。

三三二、傷寒始發熱六日，厥反九日而利。凡厥利者，當不能食。今反能食者，
恐爲除中。食以索餅，不發熱者，知胃氣尙在，必愈。恐暴熱來出而復去也，
后三日脉之，其熱續在者，期之旦日夜半愈。所以然者，本發熱六日，厥反九
日，復發熱三日，并前六日，亦爲九日，与厥相應。故期之旦日夜半愈。后三
日脉之而脉數，其熱不罷者，此爲熱氣有余，必發癰膿也。

三三三、傷寒脉遲六七日，而反与黃芩湯徹其熱。脉遲爲寒，今与黃芩湯復除其熱，腹中應冷，當不能食，今反能食，此名除中。必死。

三三四、傷寒先厥后發熱，下利必自止，而反汗出，咽中痛者，其喉爲痺。發熱无汗，而利必自止，若不止，必便膿血，便膿血者，其喉不痺。

三三五、傷寒一二日至四五日，厥者必發熱，前熱者后必厥，厥深者熱亦深，厥微者熱亦微。厥應下之，而反發汗者，必口傷爛赤。

三三六、傷寒病，厥五日，熱亦五日。設六日，當復厥，不厥者自愈。厥終不過五日，以熱五日，故知自愈。

三三七、凡厥者，阴阳气不相順接，便爲厥。厥者，手足逆冷者是也。

三三八、傷寒，脉微而厥，至七八日肤冷，其人躁无暫安時者，此爲藏厥。非虵厥也。虵厥者，其人當吐虵。今病者靜，而復時煩者，此爲藏寒。虵上入其膈，故煩。須臾復止，得食而嘔，又煩，煩者，虵聞食臭出。其人常自吐虵。虵厥者，烏梅丸主之。又主久利。

三三九、傷寒熱少微厥，指頭寒，嘿嘿不欲食，煩躁。數日，小便利，色白者，此熱除也，欲得食，其病爲愈。若厥而嘔，胸脅煩滿者，其后必便血。

三四〇、病者手足厥冷，言我不結胸，小腹滿，按之痛者，此冷結在膀胱矣。元也。

三四一、傷寒發熱四日，厥反三日，復熱四日，厥少熱多者，其病當愈。四日至七日，熱不除者，必便膿血。

三四二、傷寒厥四日，熱反三日，復厥五日，其病爲進。寒多熱少，陽氣退，故爲進也。

三四三、傷寒六七日，脈微，手足厥冷，煩躁，灸厥陰，厥不还者，死。

三四四、傷寒發熱，下利厥逆，躁不得臥者，死。

三四五、傷寒發熱，下利至甚，厥不止者，死。

三四六、傷寒六七日不利，便發熱而利，其人汗出不止者，死，有陰無陽故也。

三四七、傷寒五六日，不結胸，腹濡，脈虛復厥者，不可下。此亡血，下之，

死。

三四八、發熱而厥，七日下利者，爲難治。

三四九、傷寒，脈促，手足厥逆，可灸之。

三五〇、傷寒，脈滑而厥者，里有熱，白虎湯主之。

三五一、手足厥寒，脈細欲絕者，當歸四逆湯主之。

三五二、若其人內有久寒者，宜當歸四逆加吳茱萸生姜湯。

三五三、大汗出，熱不去，內拘急，四肢疼，又下利厥逆而惡寒者，四逆湯主之。

三五四、大汗，若大下利而厥冷者，四逆湯主之。

三五五、病人手足厥冷，脈乍緊者，邪結在胸中。心下滿而煩，饑不能食者，病在胸中。當須吐之，宜瓜蒂散。

三五六、傷寒厥而心下悸，宜先治水，當服茯苓甘草湯，却治其厥。不爾，水漬入胃，必作利也。

三五七、傷寒六七日，大下后，寸脉沉而遲，手足厥逆，下部脉不至，咽喉不利，唾膿血，泄利不止者，爲難治。麻黃升麻湯主之。

三五八、傷寒四五日，腹中痛，若轉氣下趨少腹者，此欲自利也。

三五九、傷寒，本自寒下，医反復吐下之，寒格，更逆吐下，若食入口即吐，干姜黃芩黃連人參湯主之。

三六〇、下利，有微熱而渴，脉弱者，今自愈。

三六一、下利，脉數，有微熱汗出，今自愈。設復緊，爲未解。

三六二、下利，手足厥冷，无脉者，灸之。不溫，若脉不还，反微喘者，死。少陰負趺阳者爲順也。

三六三、下利，寸脉反浮數，尺中自澀者，必清膿血。

三六四、下利清谷，不可攻表，汗出必脹滿。

三六五、下利，脉沉弦者，下重也。脉大者，爲未止。脉微弱數者，爲欲自止，雖發熱，不死。

三六六、下利，脉沉而遲，其人面少赤，身有微熱，下利清谷者，必郁冒汗出而解，病人必微厥。所以然者，其面戴阳，下虛故也。

三六七、下利，脉數而渴者，今自愈。設不差，必清膿血，以有熱故也。

三六八、下利后脉絕，手足厥冷，晬時脉还，手足溫者生，脉不还者死。

三六九、傷寒下利，日十余行，脉反實者，死。

三七〇、下利清谷，里寒外熱，汗出而厥者，通脉四逆湯主之。

三七一、熱利，下重者，白頭翁湯主之。

三七二、下利腹脹滿，身體疼痛者，先溫其里，乃攻其表。溫里，宜四逆湯；攻表，宜桂枝湯。

三七三、下利，欲飲水者，以有熱故也，白頭翁湯主之。

三七四、下利，譫語者，有燥屎也，宜小承氣湯。

三七五、下利后，更煩，按之心下濡者，爲虛煩也，宜梔子豉湯。

三七六、嘔家，有癰膿者，不可治嘔，膿尽自愈。

三七七、嘔而脉弱，小便復利，身有微熱，見厥者難治。四逆湯主之。

三七八、干嘔，吐涎沫，頭痛者，吳茱萸湯主之。

三七九、嘔而發熱者，小柴胡湯主之。

三八〇、傷寒大吐大下之，極虛，復極汗者，其人外氣怫郁，復与之水，以發其汗，因得嘔。所以然者，胃中寒冷故也。

三八一、傷寒，嘔而腹滿，視其前后，知何部不利，利之則愈。

辨霍乱病脉證并治第十三

三八二、問曰：病有霍乱者何？答曰：嘔吐而利，此名霍乱。

三八三、問曰：病發熱，頭痛，身疼，惡寒，吐利者，此属何病？答曰：此名霍乱。霍乱自吐下，又利止，復更發熱也。

三八四、傷寒，其脉微澀者，本是霍乱，今是傷寒，却四五日，至阴經上，轉入阴必利，本嘔下利者，不可治也。欲似大便，而反失气，仍不利者，此属阳

明也，便必硬，十三日愈。所以然者，經尽故也。下利后，當便硬，硬則能食者愈。今反不能食，到后經中，頗能食，復過一經能食，過之一日當愈，不愈者，不屬陽明也。

三八五、（康平本有：吐利）惡寒，脉微而復利，利止，亡血也，四逆加人參湯主之。

三八六、霍亂，頭痛發熱，身疼痛，熱多欲飲水者，五苓散主之，寒多不用水者，理中丸主之。

三八七、吐利止而身痛不休者，當消息和解其外，宜桂枝湯。小和之。

三八八、吐利汗出，發熱惡寒，四肢拘急，手足厥冷者，四逆湯主之。

三八九、既吐且利，小便復利而大汗出，下利清谷，內寒外熱，脉微欲絕者，四逆湯主之。

三九〇、吐已，下斷，汗出而厥，四肢拘急不解，脉微欲絕者，通脉四逆加猪胆汁湯主之。

三九一、吐利發汗，脉平，小煩者，以新虛不胜谷气故也。

辨阴阳易差后勞復病脉證并治第十四

三九二、傷寒阴易之爲病，其人身体重，少气，少腹里急，或引阴中拘攣，熱上冲胸，頭重不欲舉，眼中生花，膝脛拘急者，燒禪散主之。

三九三、大病差后，勞復者，枳實梔子豉湯主之。

三九四、傷寒差以后，更發熱，小柴胡湯主之。脉浮者，以汗解之。脉沉實（一作緊）者，以下解之。

三九五、大病差后，从腰以下有水气者，牡蠣澤瀉散主之。

三九六、大病差后，喜唾，久不了了，胸上有寒，當以丸藥溫之。宜理中丸。

三九七、傷寒解后，虛羸少气，气逆欲吐，竹叶石膏湯主之。

三九八、病人脉已解，而日暮微煩，以病新差，人强与谷，脾胃气尙弱，不能消谷，故令微煩。損谷則愈。

金匱要略一 臟腑經絡先后病

一、問曰：上工治未病，何也？師曰：夫治未病者，見肝之病，知肝傳脾，當先實脾。四季脾旺不受邪，即勿補之。中工不曉相傳，見肝之病，不解實脾，惟治肝也。夫肝之病，補用酸，助用焦苦，益用甘味之藥調之。酸入肝，焦苦入心，甘入脾。脾能傷腎，腎氣微弱，則水不行；水不行，則心火氣盛，俞橋本，趙開美本，更有心火氣盛四字。則傷肺；肺被傷，則金氣不行；金氣不行，則肝氣盛。俞本有故實脾三字，則肝自愈。此治肝補脾之要妙也。肝虛則用此法，實則不在用之。經曰：虛虛實實，補不足，損有余。是其義也。余臟准此。

二、夫人秉五常，因風氣而生長，風氣雖能生万物，亦能害万物，如水能浮舟，亦能覆舟。若五臟元真通暢，人即安和，客氣邪風，中人多死。千般痰難，不越三條：一者，經絡受邪，入臟腑，爲內所因也；二者，四肢九竅，血脈相傳，壅塞不通，爲外皮膚所中也；三者，房室、金刃、虫獸所傷，以此詳之，病由

都尽。若人能養慎，不令邪風干忤經絡，适中經絡，未流傳臟腑，即医治之。四肢才覺重滯，即導引吐納，針灸膏摩，勿令九竅閉塞。更能无犯王法，禽獸灾傷，房室勿令竭乏，服食節其冷熱苦酸辛甘，不遺形体有衰，病則无由入其腠理。腠者，是三焦通會元真之處，爲血氣所注。理者，是皮膚臟腑之紋理也。

三、問曰：病人有气色見于面部，愿聞其說。師曰：鼻頭色青，腹中痛，苦冷者死。一云腹中冷，苦痛者死。鼻頭色微黑者，有水气。色黃者，胸上有寒。色白者，亡血也。設微赤，非時者死。其目正圓者，瘕，不治。又色青爲痛，色黑爲勞，色赤爲風，色黃者便難，色鮮明者有留飲。

四、師曰：病人語声寂然，喜惊呼者，骨節間病。語声喑喑然不徹者，心膈間病。語声啾啾然細而長者，頭中病一作痛。

五、師曰：息搖肩者，心中堅。息引胸中上气者，咳。息張口短气者，肺痿唾沫。

六、師曰：吸而微數，其病在中焦，實也，當下之即愈，虛者不治。在上焦者，

其吸促。在下焦者，其吸遠，此皆難治。呼吸動搖振振者，不治。

七、師曰：寸口脉動者，因其旺時而動，假令肝旺色青，四時各隨其色。肝色青而反色白，非其時色脉，皆當病。

八、問曰：有未至而至，有至而不至，有至而太過，何謂也？師曰：冬至之后，甲子夜半少阳起。少阳之時，阳始生，天得温和。以未得甲子，天因温和，此爲未至而至也。以得甲子而天未温和，此爲至而不至也。以得甲子而天大寒不解，此爲至而不去也。以得甲子而天溫如盛夏五六月時，此爲至而太過也。

九、師曰：病人脉浮者在前，其病在表；浮者在后，其病在里。腰痛背強不能行，必短气而極也。

一〇、問曰：經云：厥陽獨行，何謂也？師曰：此爲有阳无阴，故稱厥陽。

一一、問曰：寸脉沉大而滑，沉則爲實，滑則爲氣。實氣相搏，血氣入臟即死，入腑即愈，此爲卒厥。何謂也？師曰：唇口青，身冷，爲入臟即死；如身和，

汗自出，爲入腑即愈。

一二、問曰：脉脫入臟即死，入腑即愈，何謂也？師曰：非爲一病，百病皆然。譬如浸淫瘡，从口起流向四肢者，可治；从四肢流來入口者，不可治。病在外者，可治；入里者，即死。

一三、問曰：阳病十八，何謂也？師曰：頭痛，項、腰、脊、臂、腳掣痛。阴病十八，何謂也？師曰：咳，上气，喘，噦，咽，腸鳴，脹滿，心痛，拘急。五臟病各有十八，合爲九十病。人又有六微，微有十八病，合爲一百八病。五勞七傷六极，婦人三十六病，不在其中。清邪居上，濁邪居下，大邪中表，小邪中里。穀飣之邪，从口入者，宿食也。五邪中人，各有法度：風中于前，寒中于暮，濕傷于下，霧傷于上，風令脉浮，寒令脉急，霧傷皮腠，濕流關節，食傷脾胃，极寒傷經，极熱傷絡。

一四、問曰：病有急當救里、救表者，何謂也？師曰：病，医下之，續得下利，清谷不止，身体疼痛者，急當救里；后身体疼痛，清便自調者，急當救表也。

一五、夫病痼疾，加以卒病，當先治其卒病，后乃治其痼疾也。

一六、師曰：五臟病各有所得者愈，五臟病各有所惡，各隨其所不喜者爲病。病者素不應食，而反暴思之，必發熱也。

一七、夫諸病在臟欲攻之，當隨其所得而攻之，如渴者，與猪苓湯，余皆仿此。

金匱要略二 痙濕喝

一、太陽病，發熱无汗，反惡寒者，名曰剛痙。

二、太陽病，發熱汗出而不惡寒，名曰柔痙。

三、太陽病，發熱，脉沉而細者，名曰痙，爲難治。

四、太陽病，發汗太多，因致痙。

五、夫風病，下之則痙，復發汗，必拘急。

六、瘡家雖身疼痛，不可發汗，汗出則痙。

七、病者身熱足寒，頸項強急，惡寒，時頭熱，面赤目赤，獨頭動搖，卒口噤，

背反張者，瘧病也。若發其汗者，寒濕相得，其表益虛，即惡寒甚。發其汗已，其脉如蛇。

八、暴腹脹大者，爲欲解，脉如故，反伏弦者，瘧。

九、夫瘧脉，按之緊如弦，直上下行。一作筑筑而弦。《脉經》云：瘧家其脉伏堅，直上下。

一〇、瘧病有灸瘡，難治。

一一、太陽病，其證備，身體強几几，然脉反沉遲，此爲瘧，栝樓桂枝湯主之。

一二、太陽病，无汗而小便反少，气上冲胸，口噤不得語，欲作剛瘧，葛根湯主之。

一三、瘧爲病，一本瘧字上有剛字，胸滿口噤，臥不著席，脚攣急，必齮齕，可与大承气湯。

一四、太陽病，關節疼痛而煩，脉沉而細者，此名濕痺。《玉函》云中濕。濕痺之候，小便不利，大便反快，但當利其小便。

一五、濕家之爲病，一身尽疼，一云疼煩，發熱，身色如熏黃也。

一六、濕家其人但頭汗出，背強，欲得被覆向火。若下之早則噦，或胸滿，小便不利，一云利，舌上如胎者，以丹田有熱，胸上有寒，渴欲得飲而不能飲，則口燥煩也。

一七、濕家下之，額上汗出，微喘，小便利，一云不利者，死。若下利不止者亦死。

一八、風濕相搏，一身尽疼痛，法當汗出而解，值天陰雨不止，醫云此可發汗，汗之病不愈者，何也？蓋發其汗，汗大出者，但風氣去，濕氣在，是故不愈也。若治風濕者發其汗，但微微似欲出汗者，風濕俱去也。

一九、濕家病身疼發熱，面黃而喘，頭痛鼻塞而煩，其脉大，自能飲食，腹中和无病，病在頭中寒濕，故鼻塞，內藥鼻中則愈。《脉經》云：病人喘，而无濕家病以下至而喘十一字。

二〇、濕家身煩疼，可与麻黃加術湯，發其汗爲宜，慎不可以火攻之。

二一、病者一身尽疼，發熱，日晡所劇者，名風濕。此病傷于汗出當風，或久傷取冷所致也。可與麻黃杏仁薏苡甘草湯。

二二、風濕，脉浮，身重，汗出，惡風者，防己黃芪湯主之。

二三、傷寒八九日，風濕相搏，身体疼煩，不能自轉側，不嘔不渴，脉浮虛而澀者，桂枝附子湯主之。若大便堅，小便自利者，去桂加白術湯主之。金匱此處附方爲白術附子湯

二四、風濕相搏，骨節疼煩，掣痛不得屈伸，近之則痛劇，汗出短气，小便不利，惡風不欲去衣，或身微腫者，甘草附子湯主之。

二五、太陽中暈，發熱惡寒，身重而疼痛，其脉弦細芤遲。小便已，洒洒然毛耸，手足逆冷，小有勞，身即熱，口開，前板齒燥。若發其汗，則其惡寒甚。加溫針，則發熱甚。數下之，則淋甚。

二六、太陽中熱者，暈是也。汗出惡寒，身熱而渴，白虎加人參湯主之。

二七、太陽中暈，身熱疼重而脉微弱，此以夏月傷冷水，水行皮中所致也。一

物瓜蒂湯主之。

金匱要略三 百合狐惑陰陽毒

一、論曰：百合病者，百脉一宗，悉致其病也。意欲食復不能食，常默默，欲臥不能臥，欲行不能行，飲食或有美時，或有不用聞食臭時，如寒無寒，如熱無熱，口苦，小便赤，諸藥不能治，得藥則劇吐利，如有神靈者，身形如和，其脉微數。每溺時頭痛者，六十日乃愈；若溺時頭不痛，淅然者，四十日愈；若溺快然，但頭眩者，二十日愈。其證或未病而預見，或病四五日而出，或病二十日，或一月微見者，各隨證治之。

二、百合病發汗后者，百合知母湯主之。

三、百合病下之后者，滑石代赭湯主之。

四、百合病吐之后者，百合雞子湯主之。

五、百合病不經吐下發汗，病形如初者，百合地黃湯主之。

六、百合病一月不解，變成渴者，百合洗方主之。

七、百合病渴不差者，栝樓牡蠣散主之。

八、百合病變發熱者，一作發寒熱。百合滑石散主之。

九、百合病見于陰者，以陽法救之。見于陽者，以陰法救之。見陽攻陰，復發其汗，此爲逆，見陰攻陽，乃復下之，此亦爲逆。

一〇、狐惑之爲病，狀如傷寒，默默欲眠，目不得閉，臥起不安。蝕于喉爲惑，蝕于陰爲狐。不欲飲食，惡聞食臭，其面目乍赤、乍黑、乍白。蝕于上部則聲喝，一作嗄，甘草瀉心湯主之。

一一、蝕于下部則咽干，苦參湯洗之。

一二、蝕于肛者，雄黃熏之。

一三、病者脉數，无熱，微煩，默默但欲臥，汗出。初得之三四日，目赤如鳩眼，七八日，目四眦一本此有黃字黑，若能食者，膿已成也。赤豆當歸散主之。

一四、陽毒之爲病，面赤斑斑如錦紋，咽喉痛，唾膿血。五日可治，七日不可

治。升麻驚甲湯主之。

一五、陰毒之爲病，面目青，身痛如被杖，咽喉痛。五日可治，七日不可治，升麻驚甲湯去雄黃、蜀椒主之。

金匱要略四 瘡病

一、師曰：瘡脉自弦，弦數者多熱，弦遲者多寒。弦小緊者，下之差，弦遲者，可溫之。弦緊者，可發汗，針灸也。浮大者，可吐之。弦數者，風發也，以飲食消息止之。

二、病瘡，以月一日發，當以十五日愈。設不差，當月尽解。如其不差，當云何？師曰：此結爲癰瘕，名曰瘡母，急治之，宜驚甲煎丸。

三、師曰：陰氣孤絕，陽氣獨發，則熱而少氣煩冤，手足熱而欲嘔，名曰瘰癧。若但熱不寒者，邪氣內藏于心，外舍分肉之間，令人消鑠脫肉。

四、溫瘡者，其脉如平，身无寒但熱，骨節疼痛，時嘔，白虎加桂枝湯主之。

五、瘡多寒者，名曰牡瘡，蜀漆散主之。

* 附《外台秘要》牡蠣湯 治牡瘡。

* 附《外台秘要》柴胡去半夏加栝樓湯 治瘡病發渴者，亦治勞瘡。

* 附《外台秘要》柴胡桂枝干姜湯 治瘡寒多，微有熱，或但寒不熱。服一劑如神。

金匱要略五 中風歷節

一、夫風之爲病，當半身不遂，或但臂不遂者，此爲痺。脉微而數，中風使然。

二、寸口脉浮而緊，緊則爲寒，浮則爲虛，寒虛相搏，邪在皮膚。浮者血虛，

絡脉空虛，賊邪不瀉，或左或右，邪氣反緩，正氣即急，正氣引邪，喎僻不遂。

邪在于絡，肌膚不仁，邪在于經，即重不勝，邪入于腑，即不識人，邪入于臟，

舌即難言，口吐涎。

* 侯氏黑散 治大風，四肢煩重，心中惡寒不足者。《外台》治風癲。

三、寸口脉遲而緩，遲則爲寒，緩則爲虛。營緩則爲亡血，衛緩則爲中風。邪氣中經，則身痒而癢疹。心氣不足，邪氣入中，則胸滿而短氣。

*、風引湯 除熱癰瘤。

*、防己地黃湯 治病如狂狀，妄行，獨語不休，无寒熱，其脉浮。

*、頭風摩散方

四、寸口脉沉而弱，沉即主骨，弱即主筋，沉即爲腎，弱即爲肝，汗出入水中，如水傷心，歷節黃汗出，故曰歷節。

五、趺阳脉浮而滑，滑則谷氣實，浮則汗自出。

六、少阴脉浮而弱，弱則血不足，浮則爲風，風血相搏，即疼痛如掣。

七、盛人脉澀小，短氣，自汗出，歷節疼，不可屈伸，此皆飲酒汗出當風所致。

八、諸肢節疼痛，身体尪羸，脚腫如脫，頭眩短氣，溫溫欲吐，桂枝芍藥知母湯主之。

九、味酸則傷筋，筋傷則緩，名曰泄。咸則傷骨，骨傷則痿，名曰枯。枯泄相

搏，名曰斷泄。榮氣不通，衛不獨行，榮衛俱微，三焦无所御，四属斷絕，身体羸瘦。獨足腫大，黃汗出，脛冷。假令發熱，便爲歷節也。

一〇、病歷節，不可屈伸，疼痛，烏頭湯主之。

* 礬石湯 治脚氣冲心

* 附方《古今錄驗》續命湯治中風痲，身体不能自收持，口不能言，冒昧不知痛處，或拘急不得轉側。姚云：与大續命同，兼治婦人產后出血者，及老人小儿。

* 《千金》三黃湯治中風手足拘急，百節疼痛，煩熱心乱，惡寒，經日不欲飲食。

* 《近效方》術附子湯治風虛頭重眩，苦極，不知食味，暖肌補中，益精氣。

* 崔氏八味丸治脚氣上入，少腹不仁。

* 《千金方》越婢加術湯治肉極，熱則身体津脫，腠理開，汗大泄，厲風氣，下焦脚弱。

金匱要略六 血痺虛勞

一、問曰：血痺病从何得之？師曰：夫尊榮人，骨弱肌腠盛，重因疲勞汗出，臥不時動搖，加被微風，遂得之。但以脉自微澀，在寸口、关上小緊，宜針引阳气，令脉和緊去則愈。

二、血痺阴阳俱微，寸口关上微，尺中小緊，外證身体不仁，如風痺狀，黃芪桂枝五物湯主之。

三、夫男子平人，脉大爲勞，極虛亦爲勞。

四、男子面色薄者，主渴及亡血，卒喘悸，脉浮者，里虛也。

五、男子脉虛沉弦，无寒熱，短气里急，小便不利，面色白，時目瞑，兼衄，少腹滿，此爲勞使之然。

六、勞之爲病，其脉浮大，手足煩，春夏劇，秋冬瘥。阴寒精自出，酸削不能行。

七、男子脉浮弱而澀，爲无子，精气清冷一作冷。

八、夫失精家，少腹弦急，阴頭寒，目眩一作目眶痛，發落，脉极虛芤遲，爲清谷、亡血、失精。脉得諸芤動微緊，男子失精，女子梦交，桂枝加龍骨牡蠣湯主之。

* 天雄散方

九、男子平人，脉虛弱細微者，善盜汗也。

一〇、人年五六十，其病脉大者，痺俠背行，若宋本、趙本作苦腸鳴，馬刀俠瘦者，皆爲勞得之。

一一、脉沉小遲，名脫气。其人疾行則喘喝，手足逆寒，腹滿，甚則溏泄，食不消化也。

一二、脉弦而大，弦則爲減，大則爲芤，減則爲寒，芤則爲虛，虛寒相搏，此名爲革。婦人則半產漏下，男子則亡血失精。

一三、虛勞里急，悸，衄，腹中痛，梦失精，四肢酸疼，手足煩熱，咽干口燥，

小建中湯主之。

一四、虛勞里急，諸不足，黃芪建中湯主之。

一五、虛勞腰痛，少腹拘急，小便不利者，八味腎氣丸主之。附方爲腎氣丸

一六、虛勞諸不足，風氣百疾，薯蕷丸主之。

一七、虛勞虛煩不得眠，酸棗仁湯主之。

一八、五勞虛極羸瘦，腹滿不能飲食，食傷、忧傷、飲傷、房室傷、饑傷、勞傷、經絡榮衛氣傷，內有干血，肌肤甲錯，兩目黯黑，緩中補虛，大黃廬虫丸主之。

*附方《千金翼》炙甘草湯 一云復脉湯。治虛勞不足，汗出而悶，脉結悸，行動如常，不出百日，危急者，十一日死。

*《肘后》獺肝散 治冷勞，又主鬼疰一門相染。

金匱要略七 肺痿肺癰咳嗽上氣

一、問曰：熱在上焦者，因咳爲肺痿。肺痿之病，从何得之？師曰：或从汗出，或从嘔吐，或从消渴，小便利數，或从便難，又被快藥下利，重亡津液，故得之。曰：寸口脉數，其人咳，口中反有濁唾涎沫者何？師曰：爲肺痿之病。若口中辟辟燥，咳即胸中隱隱痛，脉反滑數，此爲肺癰，咳唾膿血。脉數虛者爲肺痿，數實者爲肺癰。

二、問曰：病咳逆，脉之何以知此爲肺癰？當有膿血，吐之則死，其脉何類？師曰：寸口脉微而數，微則爲風，數則爲熱。微則汗出，數則惡寒。風中于衛，呼氣不入。熱過于榮，吸而不出。風傷皮毛，熱傷血脉。風舍于肺，其人則咳，口干喘滿，咽燥不渴，時唾濁沫，時時振寒。熱之所過，血爲之凝滯，蓄結癰膿，吐如米粥。始萌可救，膿成則死。

三、上气面浮腫，肩息，其脉浮大，不治，又加利尤甚。

四、上气喘而躁者，屬肺脹，欲作風水，發汗則愈。

五、肺痿吐涎沫而不咳者，其人不渴，必遺尿，小便數。所以然者，以上虛不

能制下故也。此爲肺中冷，必眩，多涎唾，甘草干姜湯以溫之。若服湯已渴者，屬消渴。

六、咳而上氣，喉中水雞聲，射干麻黃湯主之。

七、咳逆上氣，時時唾濁，但坐不得眠，皂莢丸主之。

八、咳而脈浮者，厚朴麻黃湯主之。

九、脈沉者，澤漆湯主之。

一〇、大逆上氣，咽喉不利，止逆下氣者，麥門冬湯主之。

一一、肺癰，喘不得臥，葶藶大棗瀉肺湯主之。

一二、咳而胸滿，振寒脈數，咽干不渴，時出濁唾腥臭，久久吐膿如米粥者，爲肺癰，桔梗湯主之。

一三、咳而上氣，此爲肺脹，其人喘，目如脫狀，脈浮大者，越婢加半夏湯主之。

一四、肺脹，咳而上氣，煩躁而喘，脈浮者，心下有水，小青龍加石膏湯主之。

*《外台》炙甘草湯，治肺痿涎唾多，心中溫溫液液者。

*《千金》甘草湯 此方本出于《肘后》而《千金》主療，与《外台》炙甘草湯同，但唾多下，有出血二字。

*《千金》生姜甘草湯 治肺痿咳唾涎沫不止，咽燥而渴。

*《千金》桂枝去芍藥加皂莢湯 治肺痿吐涎沫。

*《外台》桔梗白散 治咳而胸滿，振寒脉數，咽干不渴，時出濁唾腥臭，久久吐膿如米粥者，爲肺癰。

*《千金》葶苈湯 治咳有微熱煩滿，胸中甲錯，是爲肺癰。

一五、肺癰胸滿脹，一身面目浮腫，鼻塞清涕出，不聞香臭酸辛，咳逆上氣，喘鳴迫塞，葶苈大棗瀉肺湯主之。方見上，三日一劑，可至三四劑，此先服小青龍湯一劑乃進。小青龍湯方見咳嗽門中。

金匱要略八 奔豚氣病

一、師曰：病有奔豚，有吐膿，有惊怖，有火邪，此四部病，皆从惊發得之。

師曰：奔豚病从少腹起，上冲咽喉，發作欲死，復还止，皆从惊恐得之。

二、奔豚气上冲胸，腹痛，往來寒熱，奔豚湯主之。

三、發汗后，燒針令其汗，針處被寒，核起而赤者，必發奔豚，气从少腹上至心，灸其核上各一壯，与桂枝加桂湯主之。

四、發汗后，臍下悸者，欲作奔豚，茯苓桂枝甘草大棗湯主之。

金匱要略九 胸痹心痛短气

一、師曰：夫脉當取太過不及，阳微阴弦，即胸痹而痛。所以然者，責其极虚也。今阳虚知在上焦，所以胸痹、心痛者，以其阴弦故也。

二、平人无寒熱，短气不足以息者，實也。

三、胸痹之病，喘息咳唾，胸背痛，短气，寸口脉沉而遲，关上小緊數，栝樓

薤白白酒湯主之。

四、胸痹不得臥，心痛徹背者，栝樓薤白半夏湯主之。

五、胸痹，心中痞氣，氣結在胸，胸滿，脅下逆搶心，枳實薤白桂枝湯主之，人參湯亦主之。宋本、俞本、趙本痞氣作痞留。

六、胸痹，胸中氣塞，短氣，茯苓杏仁甘草湯主之，橘枳姜湯亦主之。

七、胸痹緩急者，薤白附子散主之。

八、心中痞，諸逆心懸痛，桂枝生姜枳實湯主之。

九、心痛徹背，背痛徹心，烏頭赤石脂丸主之。

* 九痛丸治九種心痛。

金匱要略一〇 腹滿寒疝宿食

一、趺陽脈微弦，法當腹滿，不滿者必便難，兩胠疼痛，此虛寒从下上也，當以溫藥服之。

二、病者腹滿，按之不痛爲虛，痛者爲實，可下之。舌黃未下者，下之黃自去。

三、腹滿時減，復如故，此爲寒，當與溫藥。

四、病者痿黃，躁而不渴，胸中寒實而利不止者，死。

五、寸口脈弦者，即脅下拘急而痛，其人嗇嗇惡寒也。

六、夫中寒家，喜欠，其人清涕出，發熱色和者，善嚏。

七、中寒，其人下利，以里虛也，欲嚏不能，此人肚中寒。一云痛

八、夫瘦人繞臍痛，必有風冷，谷氣不行，而反下之，其氣必冲。不冲者，心下則痞。

九、病腹滿，發熱十日，脈浮而數，飲食如故，厚朴七物湯主之。

一〇、腹中寒氣，雷鳴切痛，胸脅逆滿，嘔吐，附子粳米湯主之。

一一、痛而閉者，厚朴三物湯主之。

一二、按之心下滿痛者，此爲實也，當下之，宜大柴胡湯。

一三、腹滿不減，減不足言，當須下之，宜大承氣湯。

一四、心胸中大寒痛，嘔不能飲食，腹中寒，上冲皮起，出見有頭足，上下痛

而不可觸近，大建中湯主之。

一五、脅下偏痛，發熱，其脉緊弦，此寒也，以溫藥下之，宜大黃附子湯。

一六、寒氣厥逆，赤丸主之。

一七、腹痛，脉弦而緊，弦則衛氣不行，即惡寒，緊則不欲食，邪正相搏，即爲寒疝。寒疝繞臍痛，若發則白汗出，手足厥冷，其脉沉弦（一云沉緊，一云弦）者，大烏頭煎主之。

一八、寒疝腹中痛，及脅痛里急者，當歸生姜羊肉湯主之。

一九、寒疝腹中痛，逆冷，手足不仁，若身疼痛，灸、刺、諸藥不能治，抵當烏頭桂枝湯主之。

二〇、其脉數而緊乃弦，狀如弓弦，按之不移。脉數弦者，當下其寒。脉緊大而遲者，必心下堅。脉大而緊者，陽中有陰，可下之。

*《外台》烏頭湯治寒疝腹中絞痛，賊風入攻五臟，拘急不得轉側，發作有時，使人陰縮，手足厥逆。

* 《外台》 柴胡桂枝湯 治心腹卒中痛者。

* 《外台》 走馬湯 治中惡心痛腹脹，大便不通。

二一、問曰：人病有宿食，何以別之？師曰：寸口脈浮而大，按之反澀，尺中亦微而澀，故知有宿食，大承氣湯主之。

二二、脈數而滑者，實也，此有宿食，下之愈，宜大承氣湯。

二三、下利不飲食者，有宿食也，當下之，宜大承氣湯。

二四、宿食在上脘，當吐之，宜瓜蒂散。

二五、脈緊如轉索无常者，有宿食也。

二六、脈緊，頭痛風寒，腹中有宿食不化也。一云寸口脈緊。

金匱要略一一 五臟風寒积聚

一、肺中風者，口燥而喘，身运而重，冒而腫脹。

二、肺中寒，吐濁涕。

三、肺死臟，浮之虛，按之弱如葱叶，下无根者，死。

四、肝中風者，頭目瞤，兩脅痛，行常偃，令人嗜甘。

五、肝中寒者，兩臂不舉，舌本燥，喜太息，胸中痛，不得轉側，食則吐而汗出也。《脉經》、《千金》云：時盜汗，咳，食已吐其汁。

六、肝死臟，浮之弱，按之如索不來，或曲如蛇行者，死。

七、肝著，其人常欲蹈其胸上，先未苦時，但欲飲熱，旋覆花湯主之。臣億等校諸本旋覆花湯，皆同。同恐闕訛。

八、心中風者，翕翕發熱，不能起，心中饑，食即嘔吐。

九、心中寒者，其人苦病心如啖蒜狀，劇者心痛徹背，背痛徹心，譬如蠱注。其脉浮者，自吐乃愈。

一〇、心傷者，其人勞倦，即頭面赤而下重，心中痛而自煩，發熱，當臍跳，其脉弦，此爲心臟傷所致也。

一一、心死臟，浮之實如麻豆，按之益躁疾者，死。

一二、邪哭使魂魄不安者，血气少也。血气少者属于心，心气虚者，其人则畏，合目欲眠，梦远行而精神离散，魂魄妄行。阴气衰者爲癰，阳气衰者爲狂。

一三、脾中風者，翕翕發熱，形如醉人，腹中煩重，皮目瞤瞤而短气。

一四、脾死臟，浮之大堅，按之如覆杯，洁洁狀如搖者，死。臣億等詳五臟各有中風中寒，今脾只載中風，腎中風中寒俱不載者，以古文簡乱极多，去古既遠，无他可以補綴也。

一五、趺阳脉浮而澀，浮則胃气强，澀則小便數，浮澀相搏，大便則堅，其脾爲約，麻子仁丸主之。

一六、腎著之病，其人身体重，腰中冷，如坐水中，形如水狀，反不渴，小便自利，飲食如故，病属下焦，身勞汗出，衣一作表里冷濕，久久得之，腰以下冷痛，腹重如帶五千錢，甘草干姜茯苓白術湯主之。《千金》作腎著湯。

一七、腎死臟，浮之堅，按之乱如轉丸，益下入尺中者，死。

一八、問曰：三焦竭部，上焦竭善噫，何謂也？師曰：上焦受中焦气未和，不

能消谷，故能噫耳。下焦竭，即遺溺失便，其氣不和，不能自禁制，不須治，久則愈。

一九、師曰：熱在上焦者，因咳爲肺痿；熱在中焦者，則爲堅；熱在下焦者，則尿血，亦令淋秘不通。大腸有寒者，多鶩溏；有熱者，便腸垢。小腸有寒者，其人下重便血；有熱者，必痔。

二〇、問曰：病有積、有聚、有穀氣，何謂也？師曰：積者，臟病也，終不移；聚者，府病也，發作有時，展轉痛移，爲可治；穀氣者，脅下痛，按之則愈，復發爲穀氣。諸積大法：脈來細而附骨者，乃積也。寸口，積在胸中；微出寸口，積在喉中；关上，積在臍旁；上关上，積在心下；微下关，積在少腹。尺中，積在氣冲；脈出左，積在左；脈出右，積在右；脈兩出，積在中央。各以其部處之。

一、問曰：夫飲有四，何謂也？師曰：有痰飲，有懸飲，有溢飲，有支飲。

二、問曰：四飲何以爲異？師曰：其人素盛今瘦，水走腸間，漑漑有声，謂之痰飲。飲后水流在脅下，咳唾引痛，謂之懸飲。飲水流行，歸于四肢，當汗出而不汗出，身体疼重，謂之溢飲。咳逆倚息，短气不得臥，其形如腫，謂之支飲。

三、水在心，心下堅筑，短气，惡水不欲飲。

四、水在肺，吐涎沫，欲飲水。

五、水在脾，少气身重。

六、水在肝，脅下支滿，噯而痛。

七、水在腎，心下悸。

八、夫心下有留飲，其人背寒冷如手大。

九、留飲者，脅下痛引缺盆，咳嗽則輒已。一作轉甚。

一〇、胸中有留飲，其人短气而渴，四肢歷節痛。脉沉者，有留飲。

一一、膈上病痰，滿喘咳吐，發則寒熱，背痛腰疼，目泣自出，其人振振身瞤劇，必有伏飲。

一二、夫病人飲水多，必暴喘滿。凡食少飲多，水停心下，甚者則悸，微者短氣。脉双弦者，寒也，皆大下后善虛。脉偏弦者，飲也。

一三、肺飲不弦，但苦喘短氣。

一四、支飲亦喘而不能臥，加短氣，其脉平也。

一五、病痰飲者，當以溫藥和之。

一六、心下有痰飲，胸脅支滿，目眩，茯苓桂枝白術甘草湯主之。

一七、夫短氣有微飲，當从小便去之，茯苓桂枝白術甘草湯主之，腎氣丸亦主之。

一八、病者脉伏，其人欲自利，利反快，雖利，心下續堅滿，此爲留飲欲去故也，甘遂半夏湯主之。

一九、脉浮而細滑，傷飲。

二〇、脉弦數，有寒飲，冬夏難治。

二一、脉沉而弦者，懸飲內痛。

二二、病懸飲者，十棗湯主之。

二三、病溢飲者，當發其汗，大青龍湯主之，小青龍湯亦主之。

二四、膈間支飲，其人喘滿，心下痞堅，面色黧黑，其脉沉緊，得之數十日，

医吐下之不愈，木防己湯主之。虛者即愈，實者三日復發。復与不愈者，宜木防己去石膏加茯苓芒硝湯主之。

二五、心下有支飲，其人苦冒眩，澤瀉湯主之。

二六、支飲胸滿者，厚朴大黃湯主之。

二七、支飲不得息，葶藶大棗瀉肺湯主之。

二八、嘔家本渴，渴者爲欲解，今反不渴，《千金》作嘔家不渴，渴者爲欲解，本渴今反不渴。心下有支飲故也，小半夏湯主之。《千金》云：小半夏加茯苓湯。

二九、腹滿，口舌干燥，此腸間有水气，已椒藶黃丸主之。

三〇、卒嘔吐，心下痞，膈間有水，眩悸者，小半夏加茯苓湯主之。

三一、假令瘦人臍下有悸，吐涎沫而癰眩，此水也，五苓散主之。

*附方《外台》茯苓飲治心胸中有停痰宿水，自吐出水后，心胸間虛，氣滿不能食，消痰氣，令能食。

三二、咳家其脈弦，爲有水，十棗湯主之。

三三、夫有支飲家，咳煩，胸中痛者，不卒死，至一百日或一歲，宜十棗湯。

三四、久咳數歲，其脈弱者可治，實大數者死。其脈虛者必苦冒，其人本有支飲在胸中故也，治屬飲家。

三五、咳逆倚息不得臥，小青龍湯主之。

三六、青龍湯下已，多唾口燥，寸脈沉，尺脈微，手足厥逆，氣從小腹上冲胸咽，手足痺，其面翕熱如醉狀，因復下流陰股，小便難，時復冒者，与桂苓五味甘草湯，治其氣冲。

三七、冲氣即低，而反更咳，胸滿者，用桂苓五味甘草湯去桂加干姜、細辛，

以治其咳滿。即苓甘五味姜辛湯

三八、咳滿即止，而更復渴，沖氣復發者，以細辛、干姜爲熱藥也。服之當遂渴，而渴反止者，爲支飲也。支飲者，法當冒，冒者必嘔，嘔者復內半夏，以去其水。即桂苓五味甘草去桂加干姜細辛半夏湯

三九、水去嘔止，其人形腫者，加杏仁主之。其證應內麻黃，以其人遂痹，故不內之。若逆而內之者，必厥。所以然者，以其人血虛，麻黃發其陽故也。即苓甘五味加姜辛半夏杏仁湯

四〇、若面熱如醉，此爲胃熱上沖，熏其面，加大黃以利之。即苓甘五味加姜辛半夏大黃湯

四一、先渴后嘔，爲水停心下，此屬飲家，小半夏加茯苓湯主之。

金匱要略一三 消渴小便不利淋病

一、厥陰之爲病，消渴，氣上沖心，心中疼熱，饑而不欲食，食即吐，下之不

肯止。

二、寸口脉浮而遲，浮即爲虛，遲即爲勞，虛則衛氣不足，勞則榮一云營氣竭。

趺阳脉浮而數，浮即爲氣，數即消谷而大堅一作緊，氣盛則溲數，溲數即堅，堅數相搏，即爲消渴。

三、男子消渴，小便反多，以飲一斗，小便一斗，腎氣丸主之。

四、脉浮，小便不利，微熱消渴者，宜利小便、發汗，五苓散主之。

五、渴欲飲水，水入則吐者，名曰水逆，五苓散主之。

六、渴欲飲水不止者，文蛤散主之。

七、淋之爲病，小便如粟狀，小腹弦急，痛引臍中。

八、趺阳脉數，胃中有熱，即消谷引食，大便必堅，小便即數。

九、淋家不可發汗，發汗則必便血。

一〇、小便不利者，有水氣，其人若渴，栝樓瞿麥丸主之。

一一、小便不利，蒲灰散主之，滑石白魚散、茯苓戎鹽湯并主之。

一二、渴欲飲水，口干舌燥者，白虎加人參湯主之。

一三、脉浮發熱，渴欲飲水，小便不利者，猪苓湯主之。

金匱要略一四 水气病

一、師曰：病有風水，有皮水，有正水，有石水，有黃汗。風水，其脉自浮，外證骨節疼痛，惡風。皮水，其脉亦浮，外證胛腫，按之沒指，不惡風，其腹如鼓，不渴，當發其汗。正水，其脉沉遲，外證自喘。石水，其脉自沉，外證腹滿不喘。黃汗，其脉沉遲，身發熱，胸滿，四肢頭面腫，久不愈，必致癰膿。

二、脉浮而洪，浮則爲風，洪則爲氣，風氣相搏，風強則爲隱疹，身體爲痒，痒爲泄風，久爲痂癬。氣強則爲水，難以俯仰。風氣相擊，身體洪腫，汗出乃愈。惡風則虛，此爲風水。不惡風者，小便通利，上焦有寒，其口多涎，此爲黃汗。

三、寸口脉沉滑者，中有水氣，面目腫大，有熱，名曰風水。視人之目窠上微

擁，如蚕新臥起狀，其頸脉動，時時咳，按其手足上，陷而不起者，風水。

四、太陽病，脉浮而緊，法當骨節疼痛，反不疼，身体反重而酸，其人不渴，汗出即愈，此爲風水。惡寒者，此爲極虛，發汗得之。渴而不惡寒者，此爲皮水。身腫而冷，狀如周痺，胸中窒，不能食，反聚痛，暮躁不得眠，此爲黃汗，痛在骨節。咳而喘，不渴者，此爲脾脹，其狀如腫，發汗即愈。然諸病此者，渴而下利，小便數者，皆不可發汗。

五、里水者，一身面目黃腫，其脉沉，小便不利，故令病水。假如小便自利，此亡津液，故令渴也。越婢加術湯主之。

六、趺阳脉當伏，今反緊，本自有寒，疝瘕，腹中痛，医反下之，下之即胸滿短气。

七、趺阳脉當伏，今反數，本自有熱，消谷，小便數，今反不利，此欲作水。

八、寸口脉浮而遲，浮脉則熱，遲脉則潛，熱潛相搏，名曰沉。趺阳脉浮而數，浮脉即熱，數脉即止，熱止相搏，名曰伏。沉伏相搏，名曰水。沉則脉絡虛，

伏則小便難，虛難相搏，水走皮膚，即爲水矣。

九、寸口脉弦而緊，弦則衛氣不行，即惡寒，水不沾流，走于腸間。少陰脉緊而沉，緊則爲痛，沉則爲水，小便即難。

一〇、脉得諸沉，當責有水，身體腫重。水病脉出者死。

一一、夫水病人，目下有臥蚕，面目鮮澤，脉伏，其人消渴。病水腹大，小便不利，其脉沉絕者，有水，可下之。

一二、問曰：病下利后，渴飲水，小便不利，腹滿因腫者，何也？答曰：此法當病水，若小便自利及汗出者，自當愈。

一三、心水者，其身重而少氣，不得臥，煩而躁，其人陰腫。

一四、肝水者，其腹大，不能自轉側，脅下腹痛，時時津液微生，小便續通。

一五、肺水者，其身腫，小便難，時時鴨澹。

一六、脾水者，其腹大，四肢苦重，津液不生，但苦少氣，小便難。

一七、腎水者，其腹大，臍腫腰痛，不得溺，陰下濕如牛鼻上汗，其足逆冷，

面反瘦。

一八、師曰：諸有水者，腰以下腫，當利小便；腰以上腫，當發汗乃愈。

一九、師曰：寸口脉沉而遲，沉則爲水，遲則爲寒，寒水相搏。趺阳脉伏，水谷不化，脾气衰則驚漉，胃气衰則身腫。少阳脉卑，少阴脉細，男子則小便不利，婦人則經水不通。經爲血，血不利則爲水，名曰血分。

二〇、問曰：病有血分、水分，何也？師曰：經水前斷，后病水，名曰血分，此病難治；先病水，后經水斷，名曰水分，此病易治。何以故？去水，其經自下。此條原本缺，据《脉經》及其他注本補入。

二一、問曰：病者苦水，面目身体四肢皆腫，小便不利，脉之，不言水，反言胸中痛，气上冲咽，狀如炙肉，當微咳喘。審如師言，其脉何类？師曰：寸口脉沉而緊，沉爲水，緊爲寒，沉緊相搏，結在臍元，始時當微，年盛不覺。阳衰之后，營衛相干，阳損阴盛，結寒微動，肾气上冲，咽喉塞噎，脅下急痛。医以爲留飲而大下之，气擊不去，其病不除。后重吐之，胃家虚煩，咽燥欲飲。

水，小便不利，水谷不化，面目手足浮腫。又以葶藶丸下水，當時如小差，食飲過度，腫復如前，胸脅苦痛，象若奔豚，其水揚溢，則浮咳喘逆。當先攻擊冲气，令止，乃治咳，咳止，其喘自差。先治新病，病當在后。

二二、風水，脉浮身重，汗出惡風者，防己黃芪湯主之。腹痛加芍藥。

二三、風水惡風，一身悉腫，脉浮不渴，續自汗出，无大熱，越婢湯主之。

二四、皮水爲病，四肢腫，水气在皮肤中，四肢聶聶動者，防己茯苓湯主之。

二五、里水，越婢加術湯主之，甘草麻黃湯亦主之。

二六、水之爲病，其脉沉小，属少阴。浮者爲風。无水，虛脹者，爲气。水，發其汗即已。脉沉者，宜麻黃附子湯。浮者，宜杏子湯。

二七、厥而皮水者，蒲灰散主之。

二八、問曰：黃汗之爲病，身体腫，一作重，發熱汗出而渴，狀如風水，汗沾衣，色正黃如柏汁，脉自沉，何从得之？師曰：以汗出入水中浴，水从汗孔入得之，宜黃芪芍藥桂枝苦酒湯主之。

二九、黃汗之病，兩脛自冷。假令發熱，此屬歷節。食已汗出，又身常暮盜汗出者，此勞氣也。若汗出已，反發熱者，久久其身必甲錯。發熱不止者，必生惡瘡。若身重，汗出已輒輕者，久久必身瞤。瞤即胸中痛，又從腰以上必汗出，下无汗，腰髀弛痛，如有物在皮中狀，劇者不能食，身疼重，煩躁，小便不利，此爲黃汗。桂枝加黃芪湯主之。

三〇、師曰：寸口脉遲而澀，遲則爲寒，澀爲血不足。趺阳脉微而遲，微則爲氣，遲則爲寒。寒氣不足，則手足逆冷。手足逆冷，則榮衛不利。榮衛不利，則腹滿腸鳴相逐，氣轉膀胱，榮衛俱勞。陽氣不通即身冷，陰氣不通即骨疼。陽前通則惡寒，陰前通則痹不仁。陰陽相得，其氣乃行，大氣一轉，其氣乃散。實則失氣，虛則遺尿，名曰氣分。

三一、氣分，心下堅，大如盤，邊如旋杯，水飲所作，桂枝去芍藥加麻黃細辛附子湯主之。

三二、心下堅，大如盤，邊如旋盤，水飲所作，枳術湯主之。

* 附方《外台》防己黃芪湯 治風水，脉浮爲在表，其人或頭汗出，表无他病，病者但下重，从腰以上爲和，腰以下當腫及阴，難以屈伸。

金匱要略一五 黃疸

一、寸口脉浮而緩，浮則爲風，緩則爲痺。痺非中風。四肢苦煩，脾色必黃，瘀熱以行。

二、趺阳脉緊而數，數則爲熱，熱則消谷，緊則爲寒，食即爲滿。尺脉浮爲傷腎，趺阳脉緊爲傷脾。風寒相搏，食谷即眩，谷气不消，胃中苦濁，濁气下流，小便不通，阴被其寒，熱流膀胱，身体尽黃，名曰谷疸。額上黑，微汗出，手足中熱，薄暮即發，膀胱急，小便自利，名曰女勞疸，腹如水狀不治。心中懊懣而熱，不能食，時欲吐，名曰酒疸。

三、阳明病，脉遲者，食難用飽，飽則發煩頭眩，小便必難，此欲作谷疸。雖下之，腹滿如故，所以然者，脉遲故也。

四、夫病酒黃疸，必小便不利，其候心中熱，足下熱，是其證也。

五、酒黃疸者，或无熱，靖言了《脉經》作了了，腹滿欲吐，鼻燥。其脉浮者，先吐之；沉弦者，先下之。

六、酒疸，心中熱，欲嘔者，吐之愈。

七、酒疸下之，久久爲黑疸，目青面黑，心中如啖蒜齏狀，大便正黑，皮肤爪之不仁，其脉浮弱，雖黑微黃，故知之。

八、師曰：病黃疸，發熱煩喘，胸滿口燥者，以病發時，火劫其汗，兩熱所得。然黃家所得，从濕得之。一身尽發熱而黃，肚熱，熱在里，當下之。

九、脉沉，渴欲飲水，小便不利者，皆發黃。

一〇、腹滿，舌痿黃，燥不得睡，屬黃家。舌痿疑作身痿。

一一、黃疸之病，當以十八日爲期，治之十日以上瘥，反劇爲難治。

一二、疸而渴者，其疸難治；疸而不渴者，其疸可治。發于陰部，其人必嘔；陽部，其人振寒而發熱也。

一三、谷疸之爲病，寒熱不食，食即頭眩，心胸不安，久久發黃，爲谷疸，茵陳蒿湯主之。

一四、黃家日晡所發熱，而反惡寒，此爲女勞得之。膀胱急，少腹滿，身尽黃，額上黑，足下熱，因作黑疸。其腹脹如水狀，大便必黑，時澇，此女勞之病，非水也。腹滿者難治，硝石礬石散主之。

一五、酒黃疸，心中懊懣或熱痛，梔子大黃湯主之。

一六、諸病黃家，但利其小便。假令脉浮，當以汗解之，宜桂枝加黃芪湯主之。

一七、諸黃，猪膏發煎主之。

一八、黃疸病，茵陳五苓散主之。一本云茵陳湯及五苓散并主之。

一九、黃疸腹滿，小便不利而赤，自汗出，此爲表和里實，當下之，宜大黃硝石湯。

二〇、黃疸病，小便色不變，欲自利，腹滿而喘，不可除熱，熱除必噦。噦者，小半夏湯主之。

二一、諸黃，腹痛而嘔者，宜柴胡湯。必小柴胡湯。

二二、男子黃，小便自利，當與虛勞小建中湯。

* 瓜蒂湯 治諸黃。

* 《千金》麻黃醇酒湯 治黃疸。

金匱要略一六 驚悸吐血下血胸滿瘀血

一、寸口脈動而弱，動即爲驚，弱則爲悸。

二、師曰：尺脈浮，目睛暈黃，衄未止。暈黃去，目睛慧了，知衄今止。

三、又曰：從春至夏衄者太陽。從秋至冬衄者陽明。

四、衄家不可汗，汗出必額上陷，脈緊急，直視不能眴，不得眠。

五、病人面無色，無寒熱，脈沉弦者，衄。浮弱，手按之絕者，下血。煩咳者，

必吐血。

六、夫吐血，咳逆上氣，其脈數而有熱，不得臥者，死。

七、夫酒客咳者，必致吐血，此因極飲過度所致也。

八、寸口脉弦而大，弦則爲減，大則爲芤，減則爲寒，芤則爲虛，寒虛相擊，此名曰革，婦人則半產漏下，男子則亡血。

九、亡血不可發其表，汗出即寒栗而振。

一〇、病人胸滿，唇痿舌青，口燥，但欲嗽水不欲咽，无寒熱，脉微大來遲，腹不滿，其人言我滿，爲有瘀血。

一一、病者如熱狀，煩滿，口干燥而渴，其脉反无熱，此爲陰伏，是瘀血也，當下之。

一二、火邪者，桂枝去芍藥加蜀漆牡蠣龍骨救逆湯主之。

一三、心下悸者，半夏麻黃丸主之。

一四、吐血不止者，柏叶湯主之。

一五、下血，先便后血，此遠血也，黃土湯主之。

一六、下血，先血后便，此近血也，赤豆當歸散主之。

一七、心氣不足，《千金》爲心氣不定，吐血，衄血，瀉心湯主之。

金匱要略一七 嘔吐噦下利

一、夫嘔家有癰膿，不可治嘔，膿尽自愈。

二、先嘔却渴者，此爲欲解。先渴却嘔者，爲水停心下，此屬飲家。嘔家本渴，今反不渴者，以心下有支飲故也，此屬支飲。

三、問曰：病人脉數，數爲熱，當消谷引食，而反吐者，何也？師曰：以發其汗，令阳微，膈氣虛，脉乃數。數爲客熱，不能消谷，胃中虛冷故也。脉弦者，虛也，胃氣无余，朝食暮吐，變爲胃反。寒在于上，医反下之，今脉反弦，故名曰虛。

四、寸口脉微而數，微則无氣，无氣則榮虛，榮虛則血不足，血不足則胸中冷。

五、趺阳脉浮而澀，浮則爲虛，澀則傷脾，脾傷則不磨，朝食暮吐，暮食朝吐，宿谷不化，名曰胃反。脉緊而澀，其病難治。

六、病人欲吐者，不可下之。

七、噦而腹滿，視其前后，知何部不利，利之即愈。

八、嘔而胸滿者，吳茱萸湯主之。

九、干嘔吐涎沫，頭痛者，吳茱萸湯主之。

一〇、嘔而腸鳴，心下痞者，半夏瀉心湯主之。

一一、干嘔而利者，黃芩加半夏生姜湯主之。

一二、諸嘔吐，谷不得下者，小半夏湯主之。

一三、嘔吐而病在膈上，后思水者，解，急与之。思水者，猪苓散主之。

一四、嘔而脉弱，小便復利，身有微熱，見厥者難治，四逆湯主之。

一五、嘔而發熱者，小柴胡湯主之。

一六、胃反嘔吐者，大半夏湯主之。《千金》云：治胃反不受食，食入即吐。《外

台》云：治嘔，心下痞硬者。

一七、食已即吐者，大黃甘草湯主之。《外台》方：又治吐水。

一八、胃反，吐而渴欲飲水者，茯苓澤瀉湯主之。

一九、吐后，渴欲得水而貪飲者，文蛤湯主之，兼主微風，脉緊，頭痛。

二〇、干嘔，吐逆，吐涎沫，半夏干姜散主之。

二一、病人胸中似喘不喘，似嘔不嘔，似噦不噦，徹心中憤憤然无奈者，生姜半夏湯主之。

二二、干嘔、噦，若手足厥者，橘皮湯主之。

二三、噦逆者，橘皮竹茹湯主之。

二四、夫六腑氣絕于外者，手足寒，上氣，脚縮；五臟氣絕于內者，利不禁，下甚者，手足不仁。

二五、下利，脉沉弦者，下重；脉大者，爲未止；脉微弱數者，爲欲自止，雖發熱不死。

二六、下利，手足厥冷，无脉者，灸之不溫。若脉不还，反微喘者，死。少陰負趺阳者，爲順也。

二七、下利，有微熱而渴，脉弱者，今自愈。

二八、下利，脉數，有微熱汗出，今自愈。設脉緊，爲未解。

二九、下利，脉數而渴者，今自愈。設不差，必清膿血，以有熱故也。

三〇、下利，脉反弦，發熱身汗者，自愈。

三一、下利氣者，當利其小便。

三二、下利，寸脉反浮數，尺中自澀者，必清膿血。

三三、下利清谷，不可攻其表，汗出必脹滿。

三四、下利，脉沉而遲，其人面少赤，身有微熱，下利清谷者，必郁冒，汗出而解，病人必微熱。所以然者，其面戴阳，下虛故也。

三五、下利后，脉絕，手足厥冷，晬時脉还，手足溫者生，脉不还者死。

三六、下利，腹脹滿，身體疼痛者，先溫其里，乃攻其表。溫里宜四逆湯，攻表宜桂枝湯。

三七、下利，三部脉皆平，按之心下堅者，急下之，宜大承氣湯。

三八、下利，脉遲而滑者，實也。利未欲止，急下之，宜大承氣湯。

三九、下利，脉反滑者，當有所去，下乃愈，宜大承氣湯。

四〇、下利已差，至其年月日時復發者，以病不尽故也，當下之，宜大承氣湯。

四一、下利，譫語者，有燥屎也，小承氣湯主之。

四二、下利，便膿血者，桃花湯主之。

四三、熱利下重者，白頭翁湯主之。

四四、下利后更煩，按之心下濡者，爲虛煩也，梔子豉湯主之。

四五、下利清谷，里寒外熱，汗出而厥者，通脉四逆湯主之。

四六、下利，肺痛，紫參湯主之。

四七、氣利，訶梨勒散主之。

*《千金翼》小承氣湯治大便不通，噦數譫語。

*《外台》黃芩人參湯治干嘔下利。玉函經云人參黃芩湯。本爲黃芩湯，內容與傷寒論黃芩湯內容異，故改之。

金匱要略一八 瘡癰腸癰浸淫

一、諸浮數脉，應當發熱，而反洒淅惡寒，若有痛處，當發其癰。

二、師曰：諸癰腫，欲知有膿无膿，以手掩腫上，熱者爲有膿，不熱者爲无膿。

三、腸癰之爲病，其身甲錯，腹皮急，按之濡，如腫狀，腹无积聚，身无熱，脉數，此爲腹内有癰膿，薏苡附子敗醬散主之。

四、腸癰者，少腹腫痞，按之即痛如淋，小便自調，時時發熱，自汗出，復惡寒。其脉遲緊者，膿未成，可下之，當有血。脉洪數者，膿已成，不可下也。

大黃牡丹湯主之。

五、問曰：寸口脉浮微而澀，然當亡血，若汗出，設不汗者云何？答曰：若身有瘡，被刀斧所傷，亡血故也。

六、病金瘡，王不留行散主之。

* 排膿散

* 排膿湯

七、浸淫瘡，从口流向四肢者可治，从四肢流來入口者不可治。

八、浸淫瘡，黃連粉主之。

金匱要略一九 跌蹶手指臂腫轉筋阴狐疝蛔虫

一、師曰：病跌蹶，其人但能前，不能却，刺腓入二寸，此太陽經傷也。

二、病人常以手指臂腫動，此人身体瞤瞤者，藜芦甘草湯主之。

三、轉筋之爲病，其人臂脚直，脉上下行，微弦。轉筋入腹者，雞屎白散主之。

四、阴狐疝气者，偏有小大，時時上下，蜘蛛散主之。

五、問曰：病腹痛有虫，其脉何以別之？師曰：腹中痛，其脉當沉，若弦，反

洪大，故有蛔虫。

六、蛔虫之爲病，令人吐涎，心痛發作有時，毒藥不止，甘草粉蜜湯主之。

七、蛔厥者，當吐蛔。今病者靜而復時煩，此爲臟寒，蛔上入膈，故煩。須臾

復止，得食而嘔，又煩者，蛔聞食臭出，其人當自吐蛔。

八、蛔厥者，烏梅丸主之。

金匱要略二〇 婦人妊娠病

一、師曰：婦人得平脉，阴脉小弱，其人渴，不能食，无寒熱，名妊娠，桂枝湯主之。于法六十日當有此證，設有医治逆者，却一月加吐下者，則絕之。

二、婦人宿有癥病，經斷未及三月，而得漏下不止，胎動在臍上者，爲癥瘕害。

妊娠六月動者，前三月經水利時，胎也。下血者，后斷三月衃也。所以血不止者，其症不去故也。當下其症，桂枝茯苓丸主之。

三、婦人妊娠六七月，脉弦發熱，其胎愈脹，腹痛惡寒者，少腹如扇。所以然者，子臟開故也，當以附子湯溫其臟。方未見。

四、師曰：婦人有漏下者，有半產后因續下血都不絕者，有妊娠下血者。假令妊娠腹中痛，爲胞阻，芎歸膠艾湯主之。

五、婦人怀妊，腹中疔痛，當歸芍藥散主之。

六、妊娠嘔吐不止，干姜人參半夏丸主之。

七、妊娠，小便難，飲食如故，當歸貝母苦參丸主之。

八、妊娠有水氣，身重，小便不利，洒淅惡寒，起即頭眩，葵子茯苓散主之。

九、婦人妊娠，宜常服當歸散主之。

一〇、妊娠養胎，白術散主之。

一一、婦人傷胎，怀身腹滿，不得小便，从腰以下重，如有水氣狀，怀身七月，太陰當養不養，此心氣實，當刺瀉勞宮及关元，小便微利則愈。見《玉函》。

金匱要略二一 婦人產后病

一、問曰：新產婦人有三病，一者病瘕，二者病郁冒，三者大便難，何謂也？

師曰：新產血虛，多汗出，喜中風，故令病瘕；亡血復汗，寒多，故令郁冒；亡津液，胃燥，故大便難。

二、產婦郁冒，其脉微弱，嘔不能食，大便反堅，但頭汗出。所以然者，血虛而厥，厥而必冒，冒家欲解，必大汗出。以血虛下厥，孤陽上出，故頭汗出。所以產婦喜汗出者，亡陰血虛，陽氣獨盛，故當汗出，陰陽乃復。大便堅，嘔不能食，小柴胡湯主之。

三、病解能食，七八日更發熱者，此爲胃實，大承氣湯主之。

四、產后腹中疔痛，當歸生姜羊肉湯主之，并治腹中寒疝，虛勞不足。

五、產后腹痛，煩滿不得臥，枳實芍藥散主之。

六、師曰：產婦腹痛，法當以枳實芍藥散。假令不愈者，此爲腹中有干血著臍下，宜下瘀血湯主之，亦主經水不利。

七、產后七八日，无太陽證，少腹堅痛，此惡露不尽。不大便，煩躁發熱，切脉微實，再倍發熱，日晡時煩躁者，不食，食則譫語，至夜即愈，宜大承氣湯主之。熱在里，結在膀胱也。

八、產后風，續之數十日不解，頭微痛，惡寒，時時有熱，心下悶，干嘔汗出，

雖久，阳旦證續在耳，可与阳旦湯。即桂枝湯。

九、產后中風發熱，面正赤，喘而頭痛，竹叶湯主之。

一〇、婦人乳中虛，煩乱嘔逆，安中益氣，竹皮大丸主之。

一一、產后下利虛極，白頭翁加甘草阿膠湯主之。

*附方《千金》三物黃芩湯 治婦人在草蓐，自發露得風。四肢苦煩熱，頭痛者，与小柴胡湯。頭不痛但煩者，此湯主之。

*《千金》內補當歸建中湯 治婦人產后虛羸不足，腹中刺痛不止，吸吸少氣，或苦少腹中急，摩痛引腰者，不能食飲。產后一月，日得四五劑爲善，令人強壯，宜。

金匱要略二二 婦人雜病

一、婦人中風，七八日續來寒熱，發作有時，經水适斷，此爲熱入血室，其血必結，故使如瘧狀，發作有時，小柴胡湯主之。

二、婦人傷寒發熱，經水適來，晝日明了，暮則譫語，如見鬼狀者，此爲熱入血室，治之无犯胃氣及上二焦，必自愈。

三、婦人中風，發熱惡寒，經水適來，得七八日，熱除脉遲，身凉和，胸脅滿，如結胸狀，譫語者，此爲熱入血室也，當刺期門，隨其實而取之。

四、陽明病，下血譫語者，此爲熱入血室，但頭汗出，當刺期門，隨其實而瀉之，澌然汗出者愈。

五、婦人咽中如有炙肉，半夏厚朴湯主之。

六、婦人臟躁，喜悲傷欲哭，象如神靈所作，數欠伸，甘麥大棗湯主之。

七、婦人吐涎沫，医反下之，心下即痞。當先治其吐涎沫，小青龍湯主之。涎沫止，乃治痞，瀉心湯主之。

八、婦人之病，因虛、積冷、結氣，爲諸經水斷絕，至有歷年，血寒積結胞門，寒傷經絡。凝堅在上，嘔吐涎唾，久成肺癰，形体損分。在中盤結，繞臍寒疝，或兩脅疼痛，与臟相連。或結熱中，痛在关元。脉數无瘡，肌若魚鱗，時著男

子，非止女身。在下未多，經候不勻。冷陰掣痛，少腹惡寒，或引腰脊，下根氣街，氣冲急痛，膝脛疼煩，奄忽眩冒，狀如厥癰，或有忧慘，悲傷多嘆，此皆帶下，非有鬼神，久則羸瘦，脉虛多寒。三十六病，千變万端，審脉阴阳，虛實緊弦，行其針藥，治危得安，其雖同病，脉各异源，子當辨記，勿謂不然。

九、問曰：婦人年五十所，病下利數十日不止，暮即發熱，少腹里急，腹滿，手掌煩熱，唇口干燥，何也？師曰：此病屬帶下。何以故？曾經半產，瘀血在少腹不去，何以知之？其證唇口干燥，故知之。當以溫經湯主之。

一〇、帶下經水不利，少腹滿痛，經一月再見者，土瓜根散主之。

一一、寸口脉弦而大，弦則爲臧，大則爲虢，臧則爲寒，虢則爲虛，寒虛相搏，此名曰革，婦人則半產漏下，旋覆花湯主之。

一二、婦人陷經，漏下，黑不解，膠姜湯主之。臣億等校諸本无膠姜湯方，想是前妊娠中芎歸膠艾湯。

一三、婦人少腹滿如敦狀，小便微難而不渴，生后者，此爲水与血并結在血室

也，大黃甘遂湯主之。

一四、婦人經水不利下，抵當湯主之。亦治男子膀胱滿急有瘀血者。

一五、婦人經水閉不利，臟堅癖不止，中有干血，下白物，礬石丸主之。

一六、婦人六十二種風，及腹中血氣刺痛，紅藍花酒主之。疑非仲景方。

一七、婦人腹中諸疾痛，當歸芍藥散主之。

一八、婦人腹中痛，小建中湯主之。

一九、問曰：婦人病，飲食如故，煩熱不得臥，而反倚息者，何也？師曰：此名轉胞，不得溺也。以胞系了戾，故致此病。但利小便則愈，宜腎氣丸主之。

二〇、蛇床子散方，溫陰中坐藥。

二一、少陰脉滑而數者，陰中即生瘡，陰中蝕瘡爛者，狼牙湯洗之。

二二、胃氣下泄，陰吹而正喧，此谷氣之實也，膏發煎導之。

二三、小兒疳虫蝕齒方，疑非仲景方。